

四庫全書

史部

欽定四庫全書

史部

水經注集釋訂訛卷八

詳校官監察御史_臣周元良

刑部郎中_臣許兆椿覆勘

總校官原任中允_臣王燕緒

校對官中書_臣吳裕德

謄錄監生_臣李廷讓

欽定四庫全書

水經注集釋訂卷八

歸安沈炳巽撰

濟水二

濟水又東至乘氏縣西分為二

乘氏城有二一在鉅野縣西南五十里漢置縣

一在曹縣界內後魏以後縣治也

春秋左傳僖公二十八年

按左傳三十一

年乃分曹地東傳於

濟濟水自是東北流出巨澤其一水東南流其一水

從縣東北流入鉅野澤

南為荷水北為濟瀆

荷澤在兗州府曹州境內

逕乘氏縣與濟渠濮溝合北濟自濟陽縣北東北逕

煮棗城南郡國志曰寃胸縣有煮棗城即此也漢高

祖十二年封革朱為侯國

按史記表作煮棗侯赤索隱曰漢表作革朱革音棘

姓蓋子成之後也

北濟又東北逕寃胸縣故城北

又東北逕呂都縣故城南王莽更名之曰祁都也又

東北逕定陶縣故城北漢景帝以濟水出其北東注中元六年分梁於定陶置濟陰郡指為濟而定名也

又東北與濮水

謝云水下當有會字。濮水在大名府開州東南六十里

上承濟水於封丘縣即地理志所謂濮渠水首受濟者也闕駟曰首受別濟即北濟也其故瀆自濟東北流左迤為高梁陂方三里濮水又東逕匡城北

在今開封

府睢州西三十里又直隸大名府長垣西南三十里亦有匡城孔子去衛適陳遇難

於匡者也又東北左會別濮水受河於酸棗縣故杜

預云濮水出酸棗縣首受河竹書紀年曰魏襄王十
年十月大霖雨疾風河水溢酸棗鄆漢世塞之故班
固云大堙酸棗也今無水其故瀆東北逕南北二棗
城間左傳襄公五年楚子囊伐陳公會于城棗以救
之者也濮渠又東北逕酸棗縣故城南韓國矢圈稱
曰昔天子建國名都或以合名

朱箋吳本改作姓名
王海引此亦作合名

或以山林故豫章以樹氏都酸棗以棘名邦故曰酸
棗也漢官儀曰舊河堤謁者居之城西有韓王望氣

臺孫子荆故臺賦叙曰酸棗寺門外夾道左右有兩

故臺訪之國老云韓王聽訟觀臺高一十五仞雖樓

泯滅

謝云樓下
當有榭字

然廣基似於山嶽邵公大賢猶舍甘

棠區區小國而臺觀隆崇驕盈於世以鑒來今故作

賦曰薺丘陵之邈迤亞五嶽之嵯峨言壯觀也城北

韓之市地也聶政為濮陽嚴仲子刺韓相俠累遂披

面而死其姊哭之於此城內後有漢酸棗令

酸棗今
為開封

府延津
縣地

劉孟陽碑濮水北稱成陂陂方五里號曰同

池陂又東逕胙亭東注故胙國也富辰所謂邢茅胙
祭周公之脣也濮渠又東北逕燕城內故南燕姑姓之
國也有北燕故以南氏縣東為陽清湖陂南北五里東
西三十里亦曰燕城湖逕桃城南即戰國策所謂酸棗

虛桃者

戰國策容說秦王曰王又舉甲兵而攻魏社
大梁三門舉河內拔燕酸棗虛桃人史記秦

始皇本紀注索隱曰桃人魏邑燕虛二邑名正義曰
燕古田反括地志曰南燕城古燕國也滑州胙城是

也○者下
疑漏也字

漢高帝十二年封劉襄為侯國

史記表高
帝十二年

封劉襄
為桃侯

而東注于濮俗謂之朝平溝濮渠又東北又

與酸水故瀆會酸瀆首受河於酸棗縣東逕酸棗城

北延津南謂之酸水竹書紀年曰秦蕪胡率師伐鄭

韓襄敗秦蕪胡于酸水者也酸瀆水又東北逕燕城

北又東逕滑臺城南又東南逕瓦亭南春秋定公八

年公會晉師於瓦魯尚執羔

左傳定公八年公會晉師于瓦范獻子執羔趙

簡子中行文子皆執雁魯于是始尚羔

自是會始也又東南會于濮世

謂之百尺溝濮渠之側有漆城竹書紀年梁惠成王

十六年邯鄲伐衛取漆富兵城之者也

謝云當作丘按竹書本作

兵

或亦謂之菀濮亭春秋甯武子與衛人盟于菀濮

杜預曰長垣而南近濮水也京相璠曰衛地也似非

菀而不知其所竹書紀年梁惠成王五年公子景

賈率師伐鄭韓明戰于陽

竹書作韓

我師敗逋澤北壇陵

亭亦或謂之大陵城非所究也又有桂城竹書紀年

梁惠成王十七年齊田期伐我東鄙戰于桂陽我師

敗逋亦曰桂陵案史記齊威王使田忌擊魏敗之桂

陵齊於是彊自稱為王以令天下濮渠又東逕蒲城

北故衛之蒲邑孔子將之衛子路出於蒲者也韓子
曰魯以仲夏起長溝子路為蒲宰以私粟饋衆孔子
使子貢毀其噐焉余案家語言仲由為蒲宰修溝瀆
與之簞食瓢飲夫子令賜止之無魯字又入其境三
稱其善身為大夫終死衛難濮渠又東逕韋城南即
白馬縣之韋鄉也史遷記曰夏伯豕韋之故國矣城
西出而不方城中有六大井皆隧道下俗謂之江井
也有馳道自城屬於長垣濮渠東絕東馳道逕長垣

縣故城

長垣縣今屬直隸大名府其故城在今縣西南三十五里

北衛地也故首

垣矣秦更從今名王莽改為長固縣陳留風俗傳曰

縣有防垣故縣氏之孝安帝以建光元年封元舅來

一作宋

俊為侯國縣有祭城濮渠逕其北鄭大夫祭仲

之邑也杜預曰陳留長垣縣東北有祭城者也圈稱

又言長垣縣有羅亭故長羅縣也

長羅縣故城在舊長垣縣西南三十

里漢封後將軍常惠為侯國地理志曰王莽更長羅

為惠澤後漢省并長垣有長羅澤即吳季英牧猪處

也

朱箋後漢書吳祐字季英年二十喪父居無擔石常牧豕長垣澤中後舉孝廉

又有長羅

置蘧伯玉置陳留風俗傳曰長垣縣有蘧伯鄉一名

新鄉有蘧亭伯玉祠伯玉塚曹大家東征賦曰到長

垣之境界兮察農野之居民覩蒲城之丘墟兮生荆

棘之蓁蓁蘧氏在城之東南兮民亦嚮

一作嚮今東征賦作尚

其丘墳唯令德之不朽兮身既沒而名存昔吳季札

聘上國至衛觀典府賓亭父疇以衛多君子也

朱箋按左

傳襄公二十九年吳公子札適衛說蘧瑗史狗史鰌公子荆公子發公子朝曰衛多君子未有患也今云

至衛觀典府
云云未詳

濮渠又東分為二瀆北濮出焉濮渠又

東逕須城北衛詩云思須與曹也毛云須衛邑矣鄭

云自衛而東逕邑故思濮渠又北逕襄丘亭南竹書

紀年曰襄王七年韓明率師伐襄丘十年楚庶章率

師來會我次于襄丘者也濮水東逕濮陽縣故城南

昔師延為紂作靡靡之樂武王伐紂師延東走自投

濮水而死矣後衛靈公將之晉而設舍於濮水之上

夜聞新聲召師洎受之於是水也

韓非子十過篇昔
者衛靈公將之晉

至濮水之上稅車而放馬設舍以宿夜分而聞鼓新
聲者而說之使人問左右盡報弗聞乃召師涓而告
之曰有鼓新聲者其狀似鬼神子為聽而寫之師涓
曰諾因靜坐撫琴而寫之明日報曰臣得之矣遂去
之晉晉平公鵬于施夷之臺酒酣靈公起公曰有新
聲願請以示平公曰善乃召師涓令坐師曠之旁援
琴鼓之未終師曠撫止之曰此亡國之聲不可遂也
平公曰此道奚出曠曰此師延之所作與紂為靡靡
之樂也及武王伐紂師延東走至于濮水而自投故
聞此聲者必于濮水之上先聞此聲者其國必削不
可遂也平公曰寡人所好者音子其使遂之師涓鼓究之濮水又東逕沛陰離狐
縣故城南王莽之所謂狐瑞也在兗州府曹縣界內漢為縣郡國
志曰故屬東郡濮水又東逕葭密縣故城北故城在今曹縣

西北三十里

竹書紀年幽公十三年

竹書作晉幽公三年

魯季孫會

晉文公

文公誤當是幽公

於楚丘即葭密遂城之濮水又東

北逕鹿城南郡國志曰濟陰乘氏縣有鹿城

一作乘鄉

春秋僖公二十一年盟于鹿上京杜並謂此亭也濮

水入東與勾瀆首受濮水枝渠於句陽縣東南逕勾

陽縣故城

在曹縣北三十里漢置縣後省

南春秋之穀丘也左傳以

為勾瀆之丘矣縣處其陽故縣氏焉又東入乘氏縣

左會濮水與濟同入鉅野故地理志曰濮水自濮陽

南入鉅野亦經所謂濟水自乘氏縣兩分東北入於鉅野也

濟水故瀆又北右合洪水

上承鉅野薛訓渚厯澤西北又北逕闕鄉城西春秋桓公十有一年經書公會宋公于闕郡國志曰東平陸有闕亭皇覽曰蚩尤冢在東郡壽張縣闕鄉城中冢高七尺常十月祠之有赤氣出如絳民名為蚩尤旗十三州志曰壽張有蚩尤祠又北濟

濟上當有與字瀆合

自渚迄于北口一百二十里名曰洪水桓溫以太和四年率衆北入掘渠通濟至義熙十三年劉武帝西入長安又廣其功自洪口已上又謂之桓公瀆濟自是北注也春秋莊公十八年經書夏公追戎於濟西京相璠曰濟水自鉅野至濟北是也

又東北過壽張縣西界安民亭南汶水從東北來注之

今東平州西南有壽張故城西北去今壽張縣五十里川西南十里有安山鎮即古安民亭

濟水又北汶水注之

汶水源發泰安州西南流至兗州府經寧陽平陰汶上縣界又

西至東平州界注濟河故道東北流經東阿縣界又東北流至濟南府界入海戴延之所謂

清口也郭緣生述征記曰清河首受洪水北流濟或

謂清則濟也禹貢濟東北會于汶今枯渠注巨澤巨

澤北則清水清水與汶會也

禹貢錐指濟水自荷澤東北流絕巨野澤而北

合洪水以至安民亭南者禹之舊跡也其後不知何年改從澤西之清水而繞澤北以會汶謂之清口其

澤中之道自洪口至清口者則無水故水經謂之故瀆述征記謂之枯渠今會通河運鉅野縣東北七十

里去故城已遠并清水會汶之故道亦湮沒而不可考況禹之舊跡乎。以今輿地言之汶水自萊蕪歷

泰安肥城寧陽至東平入濟合流以注于海此禹迹也迨元人引汶絕濟為會通河明永樂中又築戴村

壩遏汶水盡出南旺以資運而
安山入濟之故道填淤久矣

李欽曰汶水出太山

萊蕪縣

今屬濟陽府

西南入濟是也濟水又北逕梁山東

括地志云梁山在鄆州壽張縣南二十五里今在東
平州西南五十里接汶上縣界梁山灤在今壽張縣
東梁山之南汶濟既合東北匯而成灤日知錄云五
代史管開運元年滑州河決沒汴曹濮單鄆五州之
境環梁山合于汶水與南旺蜀山湖連瀾漫數百里
金史食貨志黃河已移故道梁山灤水退地甚廣遣
使安置屯田自此以後鉅野壽張諸邑古時潞
水之地無尺寸不耕而忘其昔日之為川浸矣

袁宏

北征賦曰背梁山截汶波即此處也劉澄之引是山

以證梁父為不近情矣山之西南有呂仲悌墓

朱箋
晉陽

陝曰呂安字仲悌東平人志量開曠有拔俗風氣與嵇康為友每一相思千里命駕河東岸有

石橋橋本當河河移故側岸也古老言此橋東海呂

母起兵所造也山北三里有呂母宅宅東三里即濟

水

朱箋東觀漢記海曲呂母之子為縣令所殺母破產結諸少年得數百人入海自稱將軍遂破海曲

執縣宰斬之以其首祭子塚

濟水又北逕須胸城西

東平州西南有須胸故城

城臨側濟水故須國風姓也春秋僖公二十一年子

魚曰任宿須胸顓臾風姓也實司太皞與有濟之祀

宋箋按左傳僖公二十一年諸侯會宋公于孟子魚曰禍其在此乎君欲已甚其何以堪之於是楚執宋公以伐宋冬會于薄以釋之子魚曰禍猶未也未足以懲君子魚之言止此其下任宿須胇云云另是一傳乃是為邾人滅須句張本如何可混作子魚之言下疑有訛脫杜注任宿須句顓臾四國名俱伏羲之後四國封近

于濟故世紀之杜預曰須胇在須昌縣西北非也地理志曰壽張縣西北有胇城者是也濟水西有安民

亭亭北對安民山東臨濟水水東即無鹽縣界也

為今

兖州府東平州州西南有須胇故城其故城在州東三十里

山西有冀州刺史王

紛碑漢中平四年立

濟水又逕微鄉東

春秋莊公二十八年經書冬築郛京相璠曰公羊傳謂之微在東平壽張縣西北三十里有故微鄉魯邑

也杜預曰有微子冢

何氏云案左傳注但云郛魯下邑無有微子冢四字蓋此處有

脫文

濟水又北分為二水其枝津西北出馬

馬下疑有脫字

或疑作焉謂之馬頰水者也

又北過須昌縣西

今東平州西有須昌縣故城

京相璠曰須朐一國二城兩名蓋遷都須昌朐是其

本秦以為縣漢高帝十一年封趙衍為侯國濟水於

縣

縣下疑有脫字

趙溝水注之

濟水又北逕魚山東左合馬頰水

元和志云魚山在東阿縣東二十里近志

云在縣西以宋初縣治東移故也

水首受濟西北流歷安民山北又西流趙溝出焉東

北注于濟馬頰水又逕桃城東春秋桓公十年經書

公會衛侯于桃丘衛地也杜預曰濟北東阿縣

今屬兗州

府東南有桃即桃丘矣馬頰水又東北流逕山南山

即吾山也漢武帝瓠子歌所謂吾山平者也山上有
抑舒城魏東阿王曹子建每登之有終焉之志及其
終也葬山西

朱云宋本
無下西字

去東阿城四十里其水又

東注于清濟謂之馬頰口也

濟水自魚山北逕清亭東

春秋隱公四年公及宋公遇于清者也京相璠曰今
濟北東阿東北四十里有故清亭即春秋所謂清者
也是濟水通得清之目焉亦水色清深用兼厥稱矣

是故燕王曰吾聞齊有清濟濁河以為固即此水也

按春秋莊公三十年公及齊侯遇于魯濟杜預曰濟水厯齊魯界在齊界為齊濟在魯界為魯濟濟水自清亭又北則為穀城齊地矣濟之為齊為魯當分于此間也

又北過穀城縣西

今為東阿縣治

濟水側岸有尹邠壘南去魚山四十餘里

魚山在東阿縣西八

里一名吾山

是穀城縣界故春秋之小穀城也齊桓公以

魯莊公二十三年城之邑管仲焉城內有夷吾井魏

土地記曰縣有穀城山

在東阿縣東北五里一名黃山

山出文石陽

穀之地春秋齊侯宋公會于陽穀者也穀有黃山臺

黃石公與張子房期處也又有狼水出東南大檻山

狼溪西

狼溪水源發東阿縣東南二十八里狼溪山下西北流經縣城內又北流入汶水

西北逕穀城西又北有西流泉出城東近山西北逕

穀城北西注狼水以其流西故即名焉又西北入清

水城西北三里有項王羽之冢半許毀壞石碣尚存

題云項王之墓皇覽云冢去縣十五里謬也今彭城

穀陽城西南又有項羽冢非也余按史遷記魯為楚

守漢王示羽首魯乃降遂以魯公禮葬羽於穀城寧

得言彼也

項羽墓今在東阿縣東南一十一里

濟水又北逕周首亭西

春秋文公十有一年左丘明云襄公二年王子成父

獲長狄僑如弟榮如埋其首於周首之北門即是邑

也

按左傳文公十有一年鄭瞞侵齊遂伐我公使叔孫得臣追之冬十月甲午敗狄于鹹獲長狄僑如

富父終甥掩其喉以戈殺之埋其首于子駒之門晉之滅潞也獲僑如之弟焚如齊襄公之二年鄭瞞伐

齊齊王子成父獲其弟榮如埋其首于周首之北門云則是十一年非十二年襄公上漏去齊字竟似

魯襄公二年矣况獲僑如者是魯之叔孫得臣獲榮如者乃齊王子成父今并僑如亦云王子成父所獲烏乎可且僑如之首埋于子駒之門榮如之首埋于周首北門傳文甚明今牽連書之則二首俱埋周首北門矣僑如下今世謂之盧子城濟北郡治也京相當有之字便明

璠曰今濟北所治盧子城故齊周首邑也

又北過臨邑縣東

按通典漢臨邑故城在盧縣東今為東昌府茌平縣地

地理志曰縣有濟水祠也王莽之穀城亭也水有石

門以石為之故濟水之門也春秋隱公五年齊鄭會

于石門鄭車僨濟即於此也

朱有箋按左傳是隱公三年

京相璠

曰石門齊地今濟北盧縣故城西南六十里有故石

門去水三百步蓋水瀆流移故側岸也

濟水又北逕平陰城西

平陰本齊地漢為盧縣晉因之隋置榆山縣後為平陰縣今屬

兗州府

春秋襄公十八年晉侯沈玉

原本

濟河會于魯濟尋

溴渠

當作

之盟同伐齊

朱箋

左傳

襄公

十八年

晉侯

伐齊將濟河中行獻子以朱

絲係

王二

穀以

荷馬

沈王

而濟

冬十月

會于

魯濟

尋

溴之

注曰

平陰

城在

濟北

盧縣

東北

其城

南

齊侯

禦諸

平

有防

防有

門于

門外

作塹

橫行

廣一

里

齊侯

禦諸

平

陰者也杜預曰城在盧縣故城東北非也京相璠曰平陰齊地也在濟北盧縣故城西南十里平陰城南有長城東至海西至濟河道所由名防門去平陰三里齊侯塹防門即此也其水引濟故瀆尚存今防門北有光里齊人言廣音與光同即春秋所謂守之廣里者也又云巫山在平陰東北昔齊侯登望晉軍畏衆而歸師曠邢伯聞烏烏之聲知齊師潛遁人物咸淪地理昭著賢於杜氏東北之證矣今巫山之上

石室世謂之孝子堂濟水右迤過為湄湖方四十餘里

濟水又東北至垣苗城西

今在濟南府長清縣西南元和志云長清縣濟水在北去

縣十里即今大清河也對岸則齊河縣大清橋跨其上為南北通衢

故洛當城也伏滔北征記曰濟水又與清河合流至

洛當者也宋武帝西征長安令桓遵鎮此故俗人有

桓苗之稱河水自泗濱口東北流而為蒲魏土地記

曰盟津河別流十里與清水合亂流而東逕洛當城

北黑白異流涇渭殊別而東南流注也

又東北過盧縣北

今為長清平陰等縣地

濟水東北與渭溝合水上承渭湖北流注濟爾雅曰

水草交曰渭通谷者微犍為舍人曰水草木交合也

朱有箋按爾雅疏李巡曰水草交會曰渭

郭景純曰微水邊通谷也釋名

曰渭眉也臨水如眉臨目也

濟水又逕盧縣故城北

故城在長清縣西南二十里

濟北郡治也漢和帝永元二年分泰山置益以濟水

在北故也濟水又逕什城北城際水湄故郾閭也祝
阿人孫什將家居之以避時難因謂之什城焉

濟水又東北與中川水合

水東南出山荏縣

山荏縣故城在今長清縣東北

之分水縣

謝云宋本作嶺

溪一源兩分泉流半解亦謂之分流交半水南出太

山入汶半水出山荏縣西北流逕東

項本作東逕

太原郡

南郡治山爐固北

朱本注孫云太原劉宋僑置山爐當作山荏謝云固北宋本作西北

與漢賓谷水合水出南格馬山漢賓溪北逕盧縣故

城北陳敦戍南西北流與中川合謂之格馬口其水
又北逕盧縣故城東而北流入濟俗謂之為沙溝水
濟水又東北右會玉水

導源太山朗公谷谷舊名琨瑞溪有沙門竺僧朗少
事佛圖澄碩學淵通尤明氣緯隱于此谷因謂之朗
公谷故車頻泰書云苻堅時沙門竺僧朗嘗從隱士
張巨和遊巨和常穴居而朗居琨瑞山大起殿舍連
樓疊閣雖素飾不同並以靜外致稱即此谷也水亦

謂之琨瑞水也其水西北流逕玉符山又曰玉水又

西北逕獵山東又西北逕祝阿縣故城東

祝阿故城亦在長清

縣野井亭西春秋昭公二十五年經書齊侯唁公于

野井是也春秋襄公十九年諸侯盟于祝阿

春秋作柯

左

傳所謂督陽者也漢興改之曰阿矣漢高帝十一年

封高邑為侯國王莽之安城者也故俗謂是水為祝

阿澗水北流注于濟建武五年耿弇東擊張步從朝

陽橋濟渡兵即是處也

濟水又東北灤水出焉

禹貢錐指寰宇記灤水在厯城西南二百步元和志全節縣濟

水在縣北四十里按今濟南府治厯城縣東有東平陵故城漢縣唐貞觀中改名全節屬齊州曾鞏齊州二堂

記曰泰山之北與齊東南諸谷之水西北合于黑水之

灣而至于渴馬之崖蓋水之來也衆其北折而西也悍疾尤甚及至于崖下則泊然而止而自崖以北至於厯

城之西蓋五十里而有泉湧出高或至數尺其旁之人

名之曰趵突之泉其注而北則謂之灤水達于清河以

入于海舟之通于濟者皆于是乎達也齊多甘泉其顯

名者十數而色味皆同以余驗之蓋皆灤水之旁出者

也齊乘曰今府城西平地泉源盛涌聲如隱雷旁合馬

跑金線諸泉周可數畝北出又合密脂五龍衆泉

並城北流屈而東至城北水門大明湖水出注也

灤水出厯縣故城西南泉源上奮水涌若輪春秋桓

公十八年公會齊侯于濊是也俗謂之為娥姜水也

以泉源有舜妃娥英廟故也城南對山山上有舜祠

山下有大穴謂之舜井

今在濟南府城內

抑亦茅山禹井之

比矣書舜耕厯山亦云在此所未詳也其水北為大

明湖

明一統志在濟南府城內西北隅源出舜井其大占府城三之一由北水門出與濟水合

西

即大明寺寺東北兩面側湖此水便成淨池也池上

有客亭左右楸桐負日俯仰目對魚島極

朱箋疑有脫字或是

望極水木明瑟可謂濠梁之性物我無違矣湖水引瀆

東入西郭東至歷城西而側城北注湖水上承東城

歷祀

李云疑作祠

下泉源競發其水北流逕歷城東又北

引水為流杯池州僚賓燕公私多萃其上分為二水
右水北出左水西逕歷城北西北為陂謂之歷水與
灤水會自水枝津合水首受歷水於歷城東東北逕
東城西而北出郭又北注灤水又北聽水出焉灤水
又北流注于濟謂之灤口也

濟水又東北

疑漏逕字

華不注山

在歷城縣東北十五里

單椒秀澤不連

湖引陵上有丘字連作綠

陵以自高虎牙桀立孤

峯特拔以刺天青崖翠發望同點黛山下有華泉故
京相璠曰春秋土地名也華泉華不注山下泉水也
春秋左傳成公二年齊頃公與晉卻克戰于鞌齊師
敗績逐之三周華不注逢丑父與公易位將及華泉
驂絙於木而止丑父使公下如華泉取飲齊侯以免
韓厥獻丑父郄子將戮之呼曰自今無有代其君任
患者有一於此將為戮矣郄子曰人不難以死免其

君我戮之不祥赦之以勸事君者乃免之即華水也

北絕聽瀆二十里注于濟

又東北過臺縣北

今歷城縣東北有臺縣故城

巨合水南出雞山西北

巨合水在濟南府城七十里東源曰偷科泉西源曰江水

泉北流各五里許合流入小清河

北逕巨合故城西耿弇之討張步

也守巨里

後漢書注巨里聚名也一名巨合今齊州

即此城也三面有城

西有深坑坑西即弇所營也與費邑戰斬邑於此巨

合水又北合闕盧水闕盧水導源馬耳山北逕博亭

城西北流至平陸城與武原水合水出譚城南平澤中世謂之武原泉北逕譚城東俗謂之有城也又北逕東平陵縣故城西故陵城也後乃加平譚國也齊桓之出過譚譚不禮焉魯莊公九年即位又不朝十年滅之城東門外有樂安任照先碑濟南治也漢文帝十六年置為王國景帝二年為郡王莽更名樂安郡其水又北逕巨合城東漢武帝以封城陽頃王子劉發于為侯國

漢表作鉅合侯發無于字

其水合關盧水而出

注巨合水西北逕臺縣故城南漢高帝六年封東郡尉戴野為侯國王莽之臺治也其水西北流白野泉水注之出臺城西南白野泉北逕留山西北流而右注巨合水又北聽水注之水上承灤水東流北屈又東北流注于巨合水亂流又北入于濟

濟水又東北合芹溝水

水出臺縣故城東南西北流逕臺城東又西北入于濟水

又東北過管縣南

今章丘縣西北有管縣故城隋改置臨濟唐屬齊州百脉出土鼓縣故城

西源方百步百泉俱出西北流注于濟元和志臨濟縣濟水在縣南二十里章丘縣濟水在縣西去縣十七

里舊志小清河在章丘縣北三十里

濟水東逕縣故城南漢景帝二年封齊悼惠王子罷

軍為侯國右納百脉水百脉水出土鼓縣故城西水

源方百步百泉俱出故謂之百脉水其水西北流逕

楊丘縣故城中漢孝景帝四年

按表是文帝四年封

以封齊悼

惠王子劉安為楊丘侯世謂之章丘城非也城南有

女郎山上有神祠俗謂之女郎祠左右民祀焉其

水西北出城北逕黃中

當作中

固蓋賊所屯故固得名

焉百脉水又東北流注于濟濟水東又有楊渚溝水

逕於陵故城西南

於陵故城在長山縣長白山北漢置縣晉改曰烏陵後省

西北

逕土鼓城東又西北逕章丘城東又北逕寧西而北

流注于濟水也

又東過梁鄒縣北

元和志濟陽濟水在縣南長山縣濟水在西北去縣三十五里鄒平縣濟

水在北去縣三十五里按梁鄒故城唐置濟陽縣屬淄州今為鄒平縣治其唐之鄒平縣則割入今之齊東縣

界金志長山新城二縣西北並有小清河
新城本漢高苑其故城在今縣東

瀧水南出長城中北流至般陽縣故城西南與般水
會水出縣東南龍山俗亦謂之為左阜水西北逕其
城南王莽之濟南亭也應邵曰縣在般水之陽縣資
名焉其水又南屈西入瀧水北逕其縣西北流至萌
水口萌水出西南甲山東北逕萌山西東北入于瀧
瀧水又西北至梁鄒東南與魚子溝水合水南出長
白山東抑泉口山即陳仲子夫妻之所隱也孟子曰

仲子齊國之世家兄戴祿萬鍾仲子非而不食避兄
離母家于於陵即此處也其水又逕於陵縣故城西
王莽之於陸也世祖建武十五年更封則鄉侯侯霸
為侯國其水北流注于瀧水瀧水即古袁水也故京
相璠曰濟南梁鄒縣有袁水者也瀧水又西北逕梁
鄒縣故城南又北屈逕其城西漢高祖六年封武虎
為侯國史記作武儒
漢書作武虎其水北注濟其城之東北又有
時水西北注焉

又東北過臨濟縣南

鉅指云今高苑城西南有臨濟故城元和志高苑縣濟水在北去縣

七十步

縣故狄邑也王莽更名利居漢記安帝永初二年改

從今名以臨濟

以臨濟三字疑衍鉅指引此作漢永初二年改名臨濟

故地理

風俗記云有樂安太守治晏謨齊記曰有南北二城

隔濟南水

一作城南

城即被陽縣之故城也北枕濟水地

理志曰侯國也如淳曰音減罷軍之罷也

朱箋按漢志注如淳

曰被一作疲音罷軍之罷也減字疑衍

史記建元以來王子侯者年表

曰漢武帝元朔四年封齊孝王子敬侯劉燕之國也

今渤海僑郡治

朱後史記劉燕封掖陽侯漢書作被俱音皮又音皮彼反

濟水又東北迤為淵渚謂之平州

涇沃側有平安縣故城

禹貢錐指註今青州府高苑縣東南十里有麻大泊一名

魚龍灣周五六十里蓋即古濟所匯之平州也

俗謂之會城非也案地理志

千乘郡有平安縣侯國也王莽曰鴻睦也應劭曰博

昌縣西南三十里有安平亭故縣也世尚存平州之

名矣濟水又東北逕高昌縣故城

在今博興縣西南屬青州府西

案地理志曰千乘郡有高昌縣漢宣帝地節四年封

董忠為侯國世謂之馬昌城此也

原本作北也從朱本作此

濟水又東北逕樂安縣

今屬青州府

故城南

云按此經舊在高昌下今據薄

姑利縣俱南直臨淄而樂安故城在博昌縣東北則此經當在利縣之後甲下之前

伏琛齊記曰博昌城

故城在博興縣東二十五里

西北五十里有

南北二城相去三十里隔時濟二水指此為博昌北

城非也樂安與博昌薄姑分水俱同西北薄姑去齊

城六十里樂安越水差遠驗非尤明班固曰千乘郡

有樂安縣應邵曰取休令之名矣漢武帝元朔五年

封李蔡為侯國

史記表于五年四月丁未封漢表作四年四月乙巳封此從史表

城

西三里有任光等冢光是縣人不得為博昌明矣濟

水又經薄姑城北

薄姑城在今博昌縣東北一十五里

後漢郡國志曰

博昌縣有薄姑城地理書曰呂尚封於齊郡薄姑薄

姑故城在臨菑縣西北五十里近濟水史遷曰胡公

徙薄姑城內有高臺春秋昭公二十二年

左傳作二十年

齊

景公飲于臺上曰古而不死何樂如之晏平仲對曰

昔爽鳩氏始居之季荊因之有逢伯陵因之蒲姑氏
又因之而後太公又因之臣以為古若不死爽鳩氏
之樂非君之樂即於是臺也濟水又東北逕狼牙
地其無
考固西而東北流也

又東北過利縣西

今博興縣東南有利縣故城
此後應接樂安縣經文

地理志曰齊郡有利縣王莽之利治也晏謨曰縣在

齊城北五十里

又東北過甲下邑入于河

濟水東北至甲下邑南東歷琅槐縣故城北地理風
俗記曰博昌東北八十里有琅槐鄉故縣也山海經
曰濟水絕鉅野注勃海入齊琅槐東北者也又東北
河水枝津注之水經以為入河非也斯乃河水注濟
非濟入河

又東北入海

錐指云按渤海在今青州府樂安縣東北一百三十里東接壽光縣界北接利津縣

界樂安本漢廣饒鉅定二縣屬齊郡其故城並在今縣東北後漢省琅槐入博昌故杜預郭璞皆言濟水至博昌入海錐指又云以今輿地言之自東平會汶以下宛州之東阿平陰濟南之長清齊河歷城章丘鄒平長

山新城青州之高苑博興樂安諸縣
界中皆禹貢濟水入海之所經也

郭景純曰濟自滎陽至樂安博昌入海今河竭濟水
仍流不絕經言入河二說並失然河水於濟漯之北
別流注海今所輟流者惟漯水耳郭或以為濟注之
事實非也尋經脉水不如山經之為密矣

禹貢錐指曰濟水自東平以下唐人謂之清河按
戰國策燕王謂薊伐曰齊有清濟濁河以為固郭
緣生曰清河首受洪水北流濟或謂清則濟也麗

道元曰濟水通得清之目亦水色清深用兼厥稱
矣此清河之名所自來也至宋又有南北清河之
名河渠志云熙寧十年河決澶州徙而東南匯于
梁山張澤灤分為二派一合南清河入于淮一合
北清河入于海南清河即泗水北清河即濟瀆也
南渡後北清河又有大小之分蓋自劉豫導灤東
行始齊乘以大清河為古濟水小清河為豫所創
志家皆沿其說黃子鴻非之曰以水經注元和志

寰宇記諸書考之濟水最南漯水在中河水最北
今者小清所經自歷城以東如章邱鄒平長山新
城高苑博興樂安諸縣皆古濟水所行而大清所
經自歷城以上至東阿固皆濟水故道而自歷城
東北如濟陽齊東青城諸縣則皆古漯水所行蒲
臺以北則故河水所經蓋宋時河嘗行漯瀆及河
去則大清兼行河漯二瀆其小清所行則斷為濟
水故道也渭按子鴻此言正三百餘年積傳之謬

蓋清河所行本濟瀆不知何時從歷城東北決而
北入濟陽縣界與漯水合而清河之名遂被于漯
據水經漯水逕著縣故城南著即今濟陽而縣南
有大清河是知大清即漯其水自歷城入濟陽乃
近世之所決非唐清河入海之故道也濟陽之流
日盛則章邱之流日微故劉豫堰漯水使東以益
之齊乘云大清河自齊河縣又北經歷城上漯橋
北漯水分智河入焉又東北經華不注山陰又
求逕下漯堰漯水舊入濟處堰南即小清河
按響河即聽水也此大清河猶是濟之故瀆其所

行者實濟水故道而志家反以濟陽之大清河為古濟舛錯殊甚不有予鴻其誰正之然大清自歷城入濟陽及濱州以東入海之道不知決于何年意者宋熙寧時河嘗合北清河入海始開此道其後金明昌五年河復由此入海久而後去流益深廣此大清之所以浩浩而小清之所以屢濬屢塞也與 水經叙濟水自滎陽以下原委甚悉杜預春秋釋例曰濟自滎陽卷縣東經陳留至濟陰北

經高平東經濟北東北經濟南至樂安博昌縣入海郭璞注山海經略同酈道元依水經以立注出河之濟又加詳焉是由東漢以迄後魏濟未嘗一日絕也唐人則據司馬彪之言以為自王莽後河南不復有濟水太子賢注後漢循吏傳曰濟水東流逕溫縣入河度河東南入鄭州又東入滑曹鄆濟青等州入海王莽末旱則枯涸但入河內而已杜佑通典曰濟水因王莽末旱渠涸不復截河過

今東平濟南淄川北海界中有水流入于海謂之
清河實荷澤汶水合流而曰濟河蓋因舊名非本
濟水也李吉甫元和郡縣志曰濟水自王莽末入
河同流于海知河南之地無濟水矣自後所說皆
襲舊名如鄆州之須昌濟州之長清盧縣齊州之
臨邑豐齊全節臨濟章邱淄州之濟陽長山鄒平
高苑青州之博昌諸縣界中並有濟水其後則不
經博昌而改從棣州之蒲臺入海是皆襲舊名而

實非濟也。涓按鴻溝既開，河水與滎濟相亂，及滎
澤塞為平地，則河南無涓滴之濟矣。水經之所謂
濟者，皆滎陽下所引之河水也。而杜預、京相璠、郭
璞、酈道元輩皆莫能辨。唐人始知之所見，遠過于
前，但以為河南之濟由王莽末旱枯而絕，則非以
余考之旱枯之事。郡國志繫河內溫下，酈注亦於
溫縣濟水故瀆，下言之。其所云枯後復通津渠，勢
改者，謂濟水自溫縣入河，不復東至武德耳。而滎

陽以下絕無一字道及殆與河南之濟無涉

詳見前

釋例自卷縣博昌而外略舉郡名故與水經不同
孔穎達以為水流之道今古或殊杜據當時所見
言之與水經乖異非也晉時濟水之道實與漢世
不殊大有詳畧非枯後復通津渠勢改也若夫唐
之清河自須昌以下所受唯荷汶則又有其故矣
蓋天寶之後汴水堙廢濟渠亦無所受荷澤以西
竟成斷港故元和志言濟自須昌始而通典云濟

河實荷汶之合流其所謂荷者即五丈溝之水西

自考城來者也迨元人開會通河引汶絕濟以資

運道明永樂中又于古四汶口之地築戴村壩遏

汶使西南流

汶水自是盡出于汶上西南至南旺入漕四分南流出上閘接沂泗六分

北流出下閘抵漳衛

唯小鹽河一綫洩入清河

小鹽河在今東阿縣西南

二十里即運河所
洩汶水支流也

清河賴諸山泉溝澤以成其川

并無荷汶之可言矣而志家猶執清河以為禹貢

之濟水不亦過乎或又云山左諸泉實皆濟水溢

為大小清河濟雖絕而不絕也然此等指為濟水則可以是为榮澤陶丘之遺跡可乎哉東漢後河南無濟水斯為定論紛紛筆舌徒茲來學之感無為也杜佑之譏水經也曰按後漢郡國志因王莽未旱比渠枯涸濟水但入河而已不復截河而南水經是和帝之後所撰乃云南過榮陽陽武封邱冤朐乘氏等縣並今縣地一依尚書禹貢舊道斯不詳之甚酈道元又從而注之其所纂叙及注

解並大紕繆涓按河北之濟因旱而枯旱止則復
出河南之濟為濁河所侵空竇盡窒河去不復能
上涌故遂絕自東漢以迄唐初凡行濟瀆者皆河
水也而猶目之曰濟是鵲巢而鳩居觚名而圜實
也故杜氏力詆水經以為不可信然滎濟故道猶
可因是而得其十之七八則此書不無補焉黃文
叔云濟水雖絕其瀆猶在雖中間經穿鑿變易或
斷或續然水之附入於其瀆者猶可尋求緝之以

存禹迹非無理也斯言蓋得其平 濟瀆之水自

周以來凡數變初為濟及導滎為川則滎與濟合
鴻溝既開滎瀆為河所亂及滎澤又塞則所行者
唯河水矣汴渠不通則鉅野以北所行唯菏汶戴
村已築則東阿以下所行唯山泉溝澤之水其號
為濟者襲舊名而已濟瀆入海之道自唐以來亦
數變初經高苑縣北又東北至博昌縣界今無元
和志蒲臺縣下云海在縣東一百四十里海畔有

一沙阜俗呼為關口淀是濟水入河之處海潮與
濟相觸故名蓋其時濟水改道從蒲臺東北與河
渾濤而入海也宋南渡後劉豫導濼水東行入濟
水故道為小清河仍經高苑縣北至樂安縣入海
及金皇統中縣令高通改由縣南長沙溝至博興
合時水入東北至樂安由馬車瀆入海瀆在縣東北五十里
今為高家港其後小清之上流堙塞鄒平長沙新城界
中故瀆皆為漯河所行漯河即楊渚溝水寰宇記

所稱獺河者也。歷城新志云：小清河自明永樂以後漸至堙塞。成化九年嘗濬治之。嘉靖十二年又塞，乃復濬。博興以西達於歷城，幾三百里。久之復淤，蓋小清唯恃灤水為源。堰東有阻，則灤水仍自華不注東北入大清河。屢濬屢塞，職是故也。水經所叙瀆同而水異，水異故李弘憲云：河南無濟水。瀆同故黃文叔云：禹迹賴此而猶存，言非一端。各有所當，今與人論濟水，苟以為無，則羣指七十二。

泉大小清河以相難若以為有則又據杜佑之說
詆水經不當襲舊名為濟明道謂與公言如扶醉
人扶得一邊起又倒却一邊真可笑又可憎也

其一水東流者過乘氏縣南

朱本無南

河水分濟於定陶東北東南右合黃汲

疑作黃溝

枝流俗

謂之界溝也北逕元氏縣故城西又北逕景山東

在曹

縣東四十里
廢楚丘城北

衛詩所謂景山與京者也毛公曰景山

大山也又北逕楚丘城西

在曹縣東南五十里

郡國志曰成武

縣有楚丘亭杜預云楚丘在成武縣西南衛懿公為狄所滅衛文公東徙渡河野處漕邑齊桓公城楚丘以遷之故春秋稱邢遷如歸衛國忘亡即詩所謂升彼墟矣以望楚矣望楚與堂景山與京故鄭玄言觀其傍邑及山川也又東北逕成武城西又東北逕郕城東在沂州東三十六里疑郕徙也所未詳矣又東北逕梁山城西地理志曰昌邑縣有梁丘縣春秋莊公三十二年宋人齊人會于梁丘者也

朱彥按左傳作宋公齊侯過于梁丘杜預

曰高平昌邑縣西南有梁丘鄉又東北於乘氏縣西而北注河水河水又東南逕乘氏縣故城南縣即春秋之乘丘也

乘丘故城在曹縣界內

故地理志風俗記曰濟陰

乘氏縣故宋乘丘邑也漢孝景中元五年封梁孝王子買為侯國也地理志曰乘氏縣泗水東南至睢陵入淮郡國志曰乘氏有泗水此乃河濟也尚書有導河濟之說自陶丘北東至於菏水無泗水之文又曰導菏澤被孟豬孟緒在睢陽縣之東北闕駟十三洲

記曰不言入而言被者明不常入也水盛方乃覆被
矣澤水淼漫俱鍾睢泗故誌有睢陵入淮之言以通
苞泗名矣然諸水注泗者多不止此可以終歸泗水
便得擅通稱也或更有泗水亦可是水之兼其目所
未詳也

又東過昌邑縣北

荷水又東逕昌邑縣故城北地理志曰縣故梁也漢
景帝中元六年分梁為山陽國漢武帝天漢四年更

為昌邑國以封昌邑王賀賀廢國除以為山陽郡

為今

兗州府金鄉縣地

王莽之鉅野郡也後更為高平郡後漢沅

州縣令王密懷金謁東萊太守楊震震不受是其慎

四知處也大城東北有金城城內有沅州刺史河東

薛季像碑以郎中拜郟令甘露降園熹平四年遷州

明年甘露復降殿前樹從事馮巡主簿華探等相與

褒樹表勒棠政次西有沅州刺史茂陽楊叔恭碑從

事孫光等以建寧四年立西北有東太山成人班孟

堅碑建和十年尚書右丞拜沅州刺史從事秦閭何氏

校改等刊石頌德政碑咸列焉閭當作閭

又東過金鄉縣南

漢為東緡縣屬山陽郡後漢分置金鄉縣以山為名晉以東緡省入後魏

以昌邑省入今屬兗州府

郡國志曰山陽有金鄉縣河水逕其故城南世謂之故縣城北有金鄉山也

又東過東緡縣北濟水又東逕漢平狄將軍扶溝侯淮陽朱鮪冢

墓北有石廟濟水又東逕東緡縣故城北故宋地春秋僖公二十三年齊侯伐宋圍緡十三州記曰山陽有東緡縣鄒衍曰余登緡城以望宋都者也後漢世祖建武十一年封馮異長子璋為侯國也

又東過方與縣北今為兗州府魚臺縣為河水濟水東逕重鄉城

南

左傳所謂臧文仲宿於重館者也河水又東逕武棠

亭北

在今魚臺縣北一十三里杜預以為即魯隱公與我會盟之地公羊以為濟上

邑也城有臺高二丈許其下臨水昔魯侯觀魚於棠

謂此也在方與縣故城

在今魚臺縣北一十三里

北十里經所謂

荷水也水又東逕泥母亭北春秋左傳僖公七年秋

盟于甯母謀伐鄭也荷水又東與鉅野黃水合荷

濟別名也黃水上承鉅澤諸陂澤有濛澱育

一作昔

陂黃湖水東流謂之黃水又有薛訓渚水自渚歷薛

村前分為二流一水東注黃水一水西北入澤即洪

水也黃水東南流水南有漢荊州刺史李剛墓剛字

叔毅山陽高車人

郡國志山陽郡有高平縣此云車誤

熹平元年卒見

其碑有石闕祠堂石室三間椽架高丈餘鏤石作椽

瓦屋施平天造方井側荷梁柱四壁隱起雕刻為君

臣官屬

上下疑有脫字

龜龍麟鳳之文飛禽走獸之像作制

工麗不甚傷毀黃水又東逕鉅野縣北何承天曰鉅

野湖澤廣大南通洙泗北連清濟舊縣故城正在澤

中故欲置戍於此城城之所在則鉅野澤也衍東北

出為大野矣昔西狩獲麟於是處也

今鉅野縣東南五十里有獲麟

臺後人所築

皇覽曰山陽鉅澤縣有肩髀冢重聚大小與

闕

史記注引
皇覽作闕

冢等傳言蚩尤與黃帝戰剋之於涿鹿

之野身體異處故別葬焉黃水又東逕咸亭北春秋

桓公七年經書焚咸丘者也水南有金鄉縣之東界

也金鄉數山皆空中穴口謂之隧也戴延之西征記

曰焦氏山北數山有漢司隸校尉魯恭穿山得白蛇

白兔不葬更葬山南鑿而得金故曰金鄉山

明一統志
金鄉山在

今鉅野南五十里山北有石洞曰清涼深十餘丈內鑿
石作四小閣閣外一堂陞高三尺堂外內門門外兩大閣

石道長三十丈濶十有六尺世傳秦始皇避暑宮也

山形峻峭冢前有石祠石

祠石廟四壁皆青石隱起自書契以來忠臣孝子貞婦孔子及弟子七十二人形像像邊皆刻石記之文字分明又有石床長八尺磨瑩鮮明叩之聲聞遠近時太尉從事中郎傅珍之諮議參軍周安穆折敗石床各取去為魯氏之後所訟二人並免官焦氏山東即金鄉山也有冢謂之秦王陵山上二百步得冢口塹深十丈兩壁峻峭廣二丈八行七十步得埏門門

外左右皆有空可容五六十人謂之白馬空埏門內

二丈得外堂外堂之後又得內堂觀者皆執燭而行雖無

他雕鏤然治石甚精或云是漢昌邑哀王家所未詳

也東南有范巨卿冢石柱

石柱一本作名件何氏云石柱隸釋載此作名件側

注云范碑至今尚在恐名件二字水經不誤也

猶存巨卿名式山陽之金鄉

人漢荊州刺史與汝南張劭長沙陳平子石交號為

死友矣

後漢書獨行傳范式字巨卿山陽金鄉人也與汝南張劭元伯為友後元伯寢疾同郡郵

君章殷子徵晨夜省視之元伯臨盡歎曰恨不見吾死友子徵曰吾與君章盡心于子是非死友復欲何

求元伯曰若二子者吾生友耳山陽范巨卿所謂死友也尋卒式忽夢見元伯元冕垂纓履履而呼曰巨卿吾以某日死當以爾時葬永歸黃泉子未我忘豈能相及式恍然覺悟悲慟泣下馳往赴之式未及到而喪已發引既至壙將窆而柩不肯進其母撫之曰元伯豈有望耶遂停柩移時乃見有素車白馬號泣而來其母望之曰是必范巨卿也巨卿既至叩喪言曰行矣元伯死生路異永從此辭會葬者千人咸為揮涕式因執紼而引柩于是乃前後到京師受業太學時諸生長沙陳平子亦同在學與式未相見而平子被病將亡謂其妻曰吾聞山陽范巨卿烈士也可託死吾歿後但以尸埋巨卿戶前乃裂素為書以遺巨卿既終妻從其言時式出行適還省書見瘞愴然感之向墳揖哭以為死友乃營護平子妻兒身自送喪于臨湘未至四五里乃黃水又東南逕任城郡委素書于柩上哭別而去

之亢父縣故城西夏后氏之任國也漢靈帝光和元

年

按後漢書郡國志帝元和元年分東平國之任城縣為任城國今云靈帝光和誤

別為任

城在北王莽之延就亭也縣有詩亭春秋之詩國也

左傳襄十三年夏取邾注邾小國也任城亢父縣有邾亭邾音詩今直云詩亭詩國似誤

王莽更

之曰順父矣地理志東平屬縣也世祖建武二年封

劉隆為侯國其中謂之桓公溝南至方與縣入于荷

水荷水又東逕秦梁夾岸積石一旦

一作里

高二丈言

秦始皇東逕所造因以名焉

河水又東過湖陸縣南東入於泗水

湖陵故城在魚臺縣東六十里按漢

書地理志湖陵縣屬山陽郡莽曰湖陸又按後漢書郡國志湖陸故湖陵章帝更名又漢志注應劭曰章帝封

東平王蒼子為湖陵侯更名湖陸

澤水所鍾也尚書曰浮于淮泗達于河

達于河陸氏釋文引說文

作荷工可反云水出山陽湖陵南與此正合今引尚書當從說文作荷為是

是也東觀漢

記曰蘇茂殺淮陽太守得其郡營廣樂大司馬吳漢

圍茂茂將其精兵突至湖陵與劉永相會濟陰山陽

濟兵於此處也

又東南過沛縣東北

金匱要略卷八

卷八

濟與泗亂故沛納于稱矣東觀漢記安平侯蓋延傳
曰延為虎牙大將軍與戰水軍反走溺水者半後與
戰連破之遂平沛楚臨淮悉降延令沛脩高祖廟置
嗇夫祝宰樂人因齋戒祠高廟也

後漢書蓋延傳光武即位以延為虎

牙將軍南伐劉永永將蘓茂佼彊周建等三萬餘人
救永共攻延與戰于沛西大破之永軍亂遁沒溺死
者大半永棄城走湖陵蘓茂奔廣樂延遂定沛楚臨
淮修高祖廟置嗇夫祝宰樂人注曰楚即今彭城縣
也臨淮郡名今泗州高祖廟在今徐州沛縣東故泗
水亭中即高祖為亭長之所也嗇夫主知廟事東觀

漢記曰時蓋延因
齋戒祠高祖廟

又東南過留縣北

留縣故城在今江南徐州府沛縣東南二十里

留縣故城翼佩泗濟宋邑也春秋左傳所謂侵宋呂
留也故繁休伯避地賦曰朝余發乎泗洲夕余宿于
留縣者也張良委身漢祖始自此矣終亦取封焉城
內有張良廟也

又東過彭城縣北睢水從西來注之

彭城縣今為徐州府

濟水又南逕彭城縣之故城東北隅不東過也睢水

自西注之城北枕水湄

濟水又南逕彭城縣故城東

不逕其縣北也蓋經誤證

又東南過徐縣北

今為淮安府地

地理志曰臨淮郡漢武帝元狩六年置徐縣王莽

更之曰淮平縣曰徐調國也

漢志無國字

春秋昭公三十

年吳子執鍾吾子遂伐徐防山以水之遂滅徐徐子

奔楚楚救徐弗及遂城夷以處之張華博物志錄徐

偃王之異言徐君宮人娠而生卵以為不祥棄之於
水濱孤獨母有犬名曰鵠倉獵於水側得棄卵銜以
來歸獨母以為異覆煖之遂成兒生時偃故以為名
徐君宮中聞之乃更錄取長而仁智襲君徐國後鵠
倉臨死生角而九尾實黃龍也偃王昔之徐界中按
博物志云偃王莖之徐梁界內即此是也昔疑當作莖今見有狗壟焉偃王治國
仁義著聞欲舟行上國乃道溝陳蔡之間得朱弓矢
以已得天瑞遂因名為號自稱徐偃王江淮諸侯服

從者三十六國周王聞之遣使至楚令伐之偃王愛
民不鬪遂為楚敗北走彭城武原縣東山下百姓隨
者萬數因名其山為徐山山上立石室廟有神靈民
人請禱焉依文即事似有符驗但世代綿遠難以詳
矣今徐城外有徐君墓昔延陵季子解劍於此所謂
不違心許也

又東至下邳睢陵縣

今為淮安府睢寧縣

南入于淮

濟水與泗水澤

宋本作渾

淘東南流至角城同入淮經書

睢陵誤耳

水經注集釋訂訛卷八

欽定四庫全書

水經注集釋訂訛卷九

歸安沈炳巽撰

清水

沁水

淇水

蕩水

洹水

清水出河內修武縣之北黑山

河內今為河南懷慶府治修武在府城東一百

二十里清水源出衛輝府輝縣西南七十里

黑山

在輝縣北四十里

在縣地

一作北一作境

白鹿山

在輝縣西北五十里

東

清水所出也上承諸陂散泉積以成川南流西南屈

朱箋御覽引此作南流屈曲

瀑布垂巖縣河注壑二十餘丈雷扑

之聲震動山谷左右

疑漏石字

壁層深獸跡不交隍中散

水霧合視不見底南峯北嶺多結禪栖之士東巖西

谷又是剎靈之圖竹柏之懷與神心妙遠仁智之性

共山水效深更為勝處也其水歷澗流飛清洞觀

朱箋

御覽引此作清冷可觀

謂之清水矣溪曰瑤溪又曰瑤澗水又

南與小瑤水合水近出西溪北窮溪東南流注之清

水清水又東南流吳澤陂水注之水上承吳陂於修武縣故城西北修武故寧也亦曰南陽矣馬季長曰晉地自朝歌以北至中山為東陽朝歌以南至軹為南陽故應劭地理風俗記云河內殷國也周名之為南陽又曰晉始啓南陽今南陽城是也秦始皇改曰修武徐廣王隱並言始皇改瓚注漢書云案韓非書秦昭王越長平西伐修武時秦未兼天下修武之名久矣余案韓詩外傳言武王伐紂勒兵於寧更名寧

曰修武矣魏獻子田大陸還卒於寧是也漢高帝八年封都尉魏邀為侯國亦曰大修武有小故稱大小修武在東漢祖與滕公濟自玉門津而宿小修武者也大陸即吳澤矣魏土地記曰修武城西北二十里有吳澤水陂南北二十許里東西三十里西則蔡溝入焉水有二源北水上承河內野王縣今為懷慶府治河內縣東北界溝為長明溝分枝津東逕雍城南寒泉水注之水出雍城西北泉流南注逕雍城西春秋僖公二

十四年王將以狄伐鄭富辰諫曰雍文之昭也京相

璠曰今河內出山陽西有故雍城

在今修武縣西

又東南注

長明溝溝水又東逕射犬城北漢大司馬張楊為將

楊醜所害眭固殺醜屯此欲北合袁紹典略曰眭固

字白兔或戒固曰將軍字兔而此邑名犬兔見犬其

勢必驚宜急去兔不從漢興平四年

按獻帝興平止二年其斬固是

建安四年今

魏太祖斬之於此

魏志張楊傳漢大司馬張楊素與呂布善

太祖之圍布楊欲救之不能乃出兵東市遙為之勢其將楊醜殺楊以應太祖楊將眭固殺醜將其衆欲

北合表紹太祖遣史渙邀擊破之于大城斬固盡收其衆魏略曰固字白兔既殺楊醜軍屯射犬時有

巫誠固曰將軍字兔而此邑名犬兔見大其勢必驚宜急移去固不從遂戰死以魏种為河

内太守守之兗州叛太祖曰唯种不棄孤及走太祖

怒曰种不南走越北走胡不置汝也射犬平禽之公

曰難其才也釋而用之

魏志武帝紀建安四年以魏种為河内太守屬以河北事

初公舉种孝廉兗州叛公曰惟魏种且不棄孤也及聞种走公怒曰种不南走越北走胡不置汝也既下

射犬生禽种公曰唯其才也釋其縛而用之

故長明溝水東入石澗東流

蔡溝水入焉水上承州縣北

漢志河内郡有州縣

白馬溝東分

為之蔡溝東會長明溝水入東逕修武縣之具亭

宋本

作吳亭

北東入吳陂又次北有苟泉水入焉水出山陽

縣故修武城西南同源分派裂為二水南為苟泉北

則吳瀆二瀆雙導俱東入陂山陽縣東北二十五里

有陸真亭南有皇母馬鳴二泉

明一統志作黃母泉在修武縣西北一十

五里又有招鳥泉馬鳴泉巧婦泉並在本縣六真鄉

東南合注于吳陂也次陸

真阜之東北得覆釜堆堆南有三泉相去四五里參

差合次南注于陂泉在濁鹿城西建安二十五年魏

封漢獻帝為山陽公濁鹿城即是公所居也

濁鹿城一名山

陽城在修武縣西北六十里

陂水之北陂澤側有隕地

疑作城

也春

秋隱公十一年王以攢茅隕十二邑與司寇蘇忿生

者也京相璠曰河內修武縣北有故隕城實中今世

俗謂之皮壇

宋本作皮壇

方四百步實中高八丈際陂北

隔水一十五里俗所謂蘭丘也方二百步西一十里

又有一丘際陂

原本作三宋本作山或作之今依朱本作陂

世謂之勑丘

方五百步形狀相類疑即古攢茅也杜預曰二邑在

修武縣北所未詳也又東長泉水注之原出白鹿山
東南伏流逕一十三里重源濬發於鄧城西北東南
伏流世亦謂之重泉水也又逕七賢祠東左右筠篁
列植冬夏不變貞萋魏步兵校尉陳留阮籍中散大
夫譙國嵇康晉司徒河內山濤司徒琅邪王戎黃門
郎河內向秀建威叅軍沛國劉伶始平太守阮咸等
同居山陽結自得之遊時人號之為竹林七賢也向
子期所謂山陽舊居也後人立廟於其處廟南又有

一泉東南流注于長泉水郭緣生述征記所云白鹿
山東南二十五里有嵇公故居以居時有遺竹焉蓋
謂此也其水又南逕鄧城東名之為鄧瀆又謂之為
白屋水也昔司馬懿征公孫淵還達白屋即於此也
其水又東南流逕隄城北又東南歷澤

何氏云疑有脫文

注

于陂泉水東流謂之八光溝而東流注于清水謂之

長清河而東周永豐塢

一作城

有丁公泉發于焦泉之

右次東又得焦泉泉發于天門之左天井固石天門

山石自空狀若門焉廣三丈高兩匹深丈餘更無所

出世謂之天門也東五百餘步中有石穴西向裁得

容人平得

二字疑誤一云當作平行

東南入徑至天井直上三匹

有餘扳躡而昇至上東平

疑作平東

西二百步南北七百

步四面嶮絕無由昇陟矣上有比丘釋僧訓精舍寺

十有餘僧給養難周多出下平

二字疑誤

有志者居之寺

左右雜樹踈挺有一石泉方丈餘清水湛然嘗無增

減山居者資以給飲北有石室二間舊是隱者念一

之所今無人矣泉發於北阜南流成漢

疑譌當也

疑

世謂焦泉也次東得魚鮑泉次東得張波泉次東

得三淵泉梗河參連女宿相屬

朱云一本作梗河參連女宿相屬吳本改

作梗柯誤矣按隋天文志梗河三星在火角北而女宿或是須女李克家云梗河三星女宿即須女四星此蓋謂魚鮑張波三淵之三泉如梗河之參連并焦泉為四似女宿之相屬也是四川在重

門城西並單川南注也重門城昔齊王芳為司馬師

廢之宮於此即魏志所謂送齊王于河內重門者也

城在共縣

今為衛輝府輝縣

故城西北二十里城南有安陽

陂次東又得卓水陂穴

在今輝縣西平地湧出

東有北門陂陂

方五百步在共縣故城西漢高帝八年封旅罷師為

共嚴侯國

按史記表作共莊侯盧罷漢表作共嚴侯旅罷蓋古盧與旅通用故漢書譌作旅而

此承其誤耳不曰莊而曰嚴者避明帝諱也

即共和之故國也共伯既歸

帝政道遙于共山之上山在國北所謂共北山也

呂氏

春秋云共伯和修其行好賢仁而海內皆以來為稽矣周厲之難天子曠絕天下皆來謂矣莊子云共伯得乎共首司馬彪注云厲王之難共伯即于王位十四年大旱屋焚召公卜之曰厲王為崇乃立宣王共伯復歸于宗道遙
仙者孫登之所處袁彥伯竹林七
得意共山之首

賢傳嵇叔夜嘗採藥山澤遇之於山冬以被髮自覆
夏則編草為裳彈一絃琴而五聲和其水三川南合
謂之清川又南逕凡城東司馬彪袁崧郡國志曰共
縣有汎亭詩凡伯國春秋隱公七年經書王使凡伯
來聘是也杜預曰汲郡共縣東南有凡城在今輝縣西南二十
里今在西南其水又西南與前四水總為一瀆又謂
之陶水南流注于清水清水又東周新豐塢又東注
也

東北過獲嘉縣北

漢書稱越相呂嘉反武帝元鼎六年巡行於汲郡

漢書

武帝紀作至汲新中鄉師古曰汲河內縣新中其鄉名也今云汲郡誤

中鄉得呂嘉首

因以為獲嘉縣後漢封侍中馮石為侯國縣故城西

有漢桂陽太守趙越墓冢北有碑越字彥善縣人也

累遷桂陽郡五官將尚書僕射遭憂服闋守河南尹

建寧中卒碑東又有一碑碑北有石柱石牛羊虎俱

碎淪毀莫記清水又東周新樂城城在獲嘉縣故城

東北即汲縣新鄉也

又東過汲縣北

今為衛輝府治

縣故汲郡治晉太康中立城西北有石夾水飛湍瀄

急也人亦謂之礧溪言太公常釣於此也城東門北

側有太公廟

衛輝府城西北二十五里有太公泉上有呂望廟

廟前有碑碑

云太公望者河內汲人也縣民故會稽太守杜宣白

令崔瑗曰太公本生於汲舊居猶存君與高國同宗

太公載在經傳今臨此國宜正其位以明尊祖之義

於是國老王喜廷掾鄭篤功曹邵勤等咸曰宜之遂
立壇祀為之位主城北三十里有太公泉泉上又有
太公廟廟側高林秀木翹楚競茂相傳云太公之故
居也晉太康中范陽盧無忌為汲令立碑於其上太
公避紂之亂屠隱市朝遁釣魚水何必渭濱然後磻
溪苟愜神心曲渚則可磻溪之名斯無嫌矣清水又
東逕故石梁下梁跨水上橋石崩褫餘基尚存清水
又東與倉水合水出西北方上山西倉谷谷有倉王

玳石故名焉其水東南流潛行地下又東南復出俗

謂之電水東南厯姆野

姆同牧說文武王與紂戰于姆野

自朝歌以

南南暨清水地平行據臯跨澤悉姆野矣郡國志

曰朝歌縣南有牧野竹書紀年曰周武王率西矣

當作

夷諸侯伐殷敗之于姆野詩所謂姆野洋洋檀車煌

煌者也有殷大夫比干冢前有石銘題隸云殷大天

比干之墓所記唯此今已中折不知誰所誌也太和

中高祖孝文皇帝南巡親幸其墳而加吊焉刊石樹

碑列于墓隧矣。電水又東南入于清水，又東南逕合城南，故三會亭也。以淇清合河，故受名焉。清水又屈而南，逕屬皇臺東北，南注之也。

又東入于河

謂之清口，即淇河口也。蓋互受其名耳。地理志曰：清河水出內黃縣南，無清水可來，所有者唯鍾是水耳。

蓋河徙南，注清水，漬移

上下疑有謚字闕文

唯流逕絕餘目，故

東川有清河之稱，相嗣不斷，目尚存。故東川曹公開

白溝遏水北注方復故瀆矣

沁水出上黨沮縣謁戾山

沮當作涅按漢志上黨郡有涅縣今為山西沁州武鄉縣

山海經曰謁戾之山沁水出焉南流注于河

沁水即洎

疑當作涅按漢志涅氏縣注師古曰涅水出焉故以名縣也

水也或言

出穀遠縣

今為沁州沁源縣及平陽府岳陽縣地

羊頭山也靡谷三源

奇注逕瀉一隍又南會三水厯洛出左右近溪參差

翼注之也

南過穀遠縣東又南過猗氏縣東

猗氏縣今屬平陽府

穀遠縣王莽之穀近也沁水又南逕猗氏縣故城東
劉聰以詹事魯繇為冀州治此也沁水又南歷猗氏
關又南與羈羈水合水出東北巨峻山乘高瀉浪觸
石流響世人因聲以納稱西南流注于沁沁水又南
與秦川水合水出巨峻山東帶引衆溪積以成川又
西南逕端氏縣故城東昔韓趙魏分晉遷晉君於端
氏縣即此是也

端氏故城在今山西澤州沁水縣東
九十里史記趙世家成侯十六年與

韓魏分晉封晉君于端氏漢為縣
屬河東郡唐置澤州治端氏縣

其水南流入于沁

水

又南過陽阿縣東

沁水南逕陽阿縣故城西魏土地記曰建興郡治陽

阿縣郡西四十里有沁水南流沁水入南與濩澤水

合水出澤城西白澗嶺下東逕濩澤明一統志作濩澤今之澤州陽

城縣即漢之獲澤縣墨子曰舜漁獲澤應邵曰澤在縣西北又

東逕獲澤縣故城南在今澤州陽城縣西三十里蓋以澤氏縣也

竹書紀年梁惠成王十九年晉取玄武獲澤者也竹書

注云即雷澤舜漁處其水際疑城東注入東合清淵水水出其

縣北東南經澤城東又南入于澤水澤水又東得陽

衆水

宋本作陽泉水

口出鹿臺山

在今澤州沁水縣南三十里

山上有水

淵而不流其水東逕陽陵城南即陽阿縣之故城也

漢高帝七年封卞訴為侯國

按史漢表高帝七年封其石為陽河侯索隱曰

縣名屬上黨郡但上黨有陽阿而無陽河則表之謫阿為河可知然所謂卞訴者並無其人惟琴操云卞和獻玉于楚王封為陵陽侯辭不受云云人與此不合殊不可解

水歷焦一本作焦燒山

東下與黑嶺水合水出西北黑嶺下即開蹬也其水

東南流逕北卿亭下又東南逕陽陵城東南注陽泉

水陽泉水又南注獲澤水又東南又有上澗水注之

水導源西北輔山東逕銅于崖南厯析城山

在今陽城縣西

南七十里

北山在獲澤南禹貢所謂底柱析城至于王屋

也山甚高竣上平坦下有二泉東濁西清左右不生

草木數十步外多細竹其水自山陰東入獲澤水獲

澤水又東南注于沁水沁水又東南陽阿水左入焉

水北出陽阿川南流逕建興郡而其水又東南流逕

午壁亭東而南入山浚波漱石瀨澗八丈環濤轂

轉西南流入于沁水又南五十餘里汾

里下疑有脫
大汾宋本作

沿上下步逕裁通小竹細筍被于山渚蒙籠拔

宋本作

密竒

宋本作最

為翳薈也

又南山過沁水縣北

今屬
澤州

沁水南逕石門也謂之沁口魏土地記曰河內郡野

王縣西七十里有沁水左逕沁水城西附城東南流

也石門是晉安平獻王司馬孚之為魏野王典農中

郎將之所造也案其表云臣孚言臣被明詔興河
內水利臣既到檢行沁水源出銅提山屈曲周廻水
道九百自太行以西王屋以東層巖高峻天時霖雨

衆谷走水小口漂迸

宋本作水
石漂迸

木門朽敗稻田汎灩

歲功不成臣輒按行去堰五里以外方石可得數萬
餘枚臣以為方石為門若天亢旱增堰進水若天霖

雨陂澤充溢則閉石

御覽引此
作閉防

斷水空渠衍澇足以

成河雲雨由人經國之謀暫勞永逸聖王所許願陛

下特出臣表勅大司農府給人工勿使稽延以贊時
要臣孚言詔書聽許於是夾岸累石結以為門用伐

御覽引
此作代

木門枋故石門舊有枋口之稱矣溉田頃畝

之數間二

此二字
疑譌

歲月之功事見門側石銘矣水西

有孔山山上石穴洞開穴內石上有車轍牛跡耆舊

傳云自然成者非人功所就也其水南分為二水一

水南出為朱溝水沁水有逕沁縣故城北蓋藉水以

名縣矣春秋之少水也京相璠曰晉地矣又云少水

今沁水也沁水又東逕沁水亭北世謂之小沁城沁水東右合小沁水水出北山臺渟淵南流為臺渟水南東入沁水沁水又東倍澗水注之水北出五行之山南流注于沁水

又東過野王縣北

今為河南懷慶府治河內縣

沁水又東邳水注之出太行之阜山則五行之異名也淮南子曰武王欲築宮於五行之山周公曰五行嶮固德能覆也內貢迴矣使吾暴亂則伐我難矣君

子以為能持滿

淮南子汜論訓曰武王克殷欲築宮于五行之山周公曰不可夫五行之

山固塞嶮阻之地也使我德能覆之則天納其貢職者迴也使我有暴亂之行則天下之伐我難矣此所

以三十六世而不奪也

周公可謂能持滿矣 高誘云今太行山也在河內

野王縣西北上黨關也詩所謂徒矻野王道傾蓋上

黨關即此山矣其水南流逕邾城西故邾關也城南

有邾臺春秋僖公二十四年王將伐鄭富辰諫曰邾

武之穆也

按左傳邾晉應韓武之穆也杜注邾音于今云邾誤下九邾俱誤作邾

京相璠

曰今野王西北三十里有故邾城邾臺是也

在今懷慶府城

西北三十里
今為邳臺村

今故城當太行南路道出其中漢武帝

封李壽為侯國邳水又東南逕孔子廟東廟庭有碑

魏太和元年孔靈度等以舊宇毀落上

上字下疑
有脫文

求

修復野王令范衆愛河中

宋本作
河內

太守元真刺史咸

陽公高允表聞立碑於廟治中劉明

疑漏
別字

駕呂次父

主簿向班虎荀靈龜以宣尼大聖非碑頌所稱宜立

記焉云仲尼傷道不行欲北從趙鞅聞殺鳴犢遂旋

車而反及其後也晉人思之於太行嶺南為之立廟

蓋往時迴轅處也余按諸子書及史籍之文並言仲
尼臨河而嘆曰丘之不濟命也夫是非太行迴轅之
言也碑云魯國孔氏官於洛陽因居廟下以奉蒸嘗
斯言至矣蓋孔因遷山下追思聖祖故立廟存饗耳
其猶劉累遷魯立堯祠於山矣非謂迴轅於此也邳
水東南逕邳亭西京相璠曰又有亭在橋一作臺西南
三十里今是亭在邳城東南七八里蓋京氏之所謬
耳或更有之余所不詳其水又南流注于沁沁水東

逕野王縣故城北秦昭王四十四年白起攻太行道絕而韓之野王降始皇拔魏東地置東郡衛元君自

濮陽徙野王即此縣也

史記衛世家秦拔魏東地置東郡更徙衛野王縣而并濮

陽為東郡

漢高帝元年為殷國二年為河內王莽之後隲

縣曰平野矣魏懷州刺史治皇都遷洛省州復郡水

北有華嶽廟廟側有攢柏數百根對郭臨川負岡陰

渚青青彌望奇可翫也懷州刺史頓丘李洪之所

經構也廟有碑焉是河內郡功曹山陽荀靈龜以和

平四年造天安元年立沁水又東朱溝枝津入焉又

東與丹水合水出上黨高都縣

今為山西澤州地其故城在州城東三十

里故城東北阜下俗謂之源源水山海經曰沁水之

東有林焉名曰丹林丹水出焉即斯水矣丹水自源

東北流又屈而東注左會絕水地理志曰高都縣有

莞谷丹水所出東南入絕

漢志作
泣水

水是也絕水出泣

氏縣

今為山西澤
州陵川縣

西北楊谷故地理志曰楊谷絕水

所出東南流左會長平水水出長平縣

長平故城在
今澤州高平

縣西北小山東南流逕其縣故城涇氏之長平亭也

史記曰秦使左庶長王齕攻韓取上黨上黨民走趙

趙軍長平使廉頗為將後遣馬服君之子趙括代之

秦密使武安君白起攻之括四十萬衆降起坑之

於此上黨記曰長平城在郡之南秦壘在城西二軍

共食流水澗相去五里秦坑趙衆收頭顱築臺於壘

中因山為臺崔嵬桀起今仍號曰白起臺

今澤州高平縣西五

里有頭顱山山上有白起臺秦白起坑趙卒四十萬後人收頭顱葬于此山因名

城之左右

汾山亘隰南北五十許里東西二十餘里悉秦趙故

壘遺壁舊

疑作

存焉漢武帝元朔二年以封將軍衛

青為侯國其東南流注絕水絕水又東南流逕洺氏

縣故城北竹書紀年曰晉烈公元年趙獻子城洺氏

絕水東南與洺水會水導源縣西北玄谷東流逕一

城故南

疑有
訛誤

俗謂之都鄉城又東南逕洺氏故城南

世祖建武六年封萬普為侯國而東會絕水亂流東

南入高都縣右入丹水上黨記曰長平城在郡南山

中丹水出長平北山南流秦坑趙衆流血丹川

朱本作丹

山由是俗名為丹水

明一統志丹水在澤州東北三十里舊號洙水源出高平縣西

北仙公山南流合白水入沁河斯為不經矣丹水又東南流注于丹

谷卽劉越石扶風歌所謂丹水者也晉書地道記曰

縣有太行關丹溪為關之東谷遂自此去不復由關

夫

疑作矣

丹水又逕二石入北

二石入北四字疑有譌誤

而各在一

山角倚相望南為河內北曰上黨三

宋本作二

郡以之分

境丹水又東南歷西巖下巖下有大泉湧發洪源巨

輪

朱云宋本作洪流巨輪疑當作洪流巨輪

淵深不測蘋藻冬

疑

芹竟川

含綠雖嚴辰肅月燕麥暄萋丹水又南白水注之水
出高都縣故城西所謂長平白水也東南流厯天井
關地理志曰高都縣有天井關蔡邕曰太行山上有
天井關在井北遂因名焉故劉歆遂初賦曰馳太行
之嶮峻入天井之高關太元十五年晉征虜將軍朱
序破慕容永於太行遣軍至白水去長子一百六十
里白水又東天井溪水會焉水出天井關北流注白

水世謂之北流泉白水又東南流入丹水謂之白水
交丹水又東南出山逕鄧城西城在山際俗謂之期
城非也司馬彪郡國志曰山陽有鄧城京相璠曰河
內山陽西北六十里有鄧城竹書紀年曰梁惠成王
元年趙成侯偃韓懿侯若伐我葵即此城也丹水又
南屈而西轉光溝水出焉丹水又西逕苑鄉城北南
屈東轉逕其城南東南流注于沁謂之丹口竹書紀
年曰晉出公五年丹水三日絕不流幽公九年丹水

出相反擊

今竹書作潔

即此水也沁水又東光溝水注之

也

疑衍

水首受丹水東南流界溝水出焉又南入沁水

又東南流逕成鄉城北又東逕中都亭南又合界溝水水上承光溝東南流長明溝水出焉又南逕中都亭西而南流注于沁水也

又東過周縣北

縣故周也春秋左傳隱公十有一年周以賜鄭公孫

段

按鄭公孫段一見于襄公二十九年一見于昭公元年其去隱公遠甚且左傳從無此文不知何據

然云六國時韓宣子

宣子是晉悼公時人伊時三家尚未分晉何得云六國時也

居之

按史記韓世家宣子徙居州注曰州縣屬河內郡則經文之周縣疑當作州

有白馬

溝水注之水首受白馬湖湖一名朱管陂陂上承長明溝湖水東南流逕金亭西分為二水一水東出為蔡溝一水南流于沁也

又東過邢丘

一曰懷縣之北今為懷慶府武涉縣

韓詩外傳曰武王伐紂到邢丘更名邢丘曰懷

今韓詩作

懷春秋時赤翟伐晉圍懷是也王莽以為河內故河

內郡治也舊三河之地矣韋昭曰河南河東河內為三河也縣北有沁陽城沁水逕其南而東注也

又東過武德縣南

武德故城在今懷慶府東南五十里

又東南至滎陽縣

北東入于河

沁水於縣南水積為陂通結數湖有朱溝水注之其

水

疑有
謫脫

上承沁水於沁水縣西北自方口東南流奉

溝水右出焉又東南流右泄為沙溝水也其水又東

南於野王城西枝渠左水焉以周城溉東逕野王城

南又屈逕其城東而北注沁水朱溝自枝渠東南逕
州城南又東逕懷城南又東逕殷城北郭緣生述征
記曰河之北岸河內懷縣有殷城或謂楚漢之際殷
王卬治之非也余按竹書紀年云秦師伐鄭次于懷
城殷殷即是城也然殷之為名久矣知非從卬始昔
劉聰以郭默為殷州刺史督緣河諸軍事治此朱溝
又東南注于湖湖水又右納沙溝水水分朱溝南派
東南逕安昌城

在今懷慶府東南六十里

西漢成帝河平四年封

丞相張禹為侯國今城之東南有古冢時人謂之張
禹墓余按漢書禹河內軹人徙冢蓮芍鴻嘉元年禹
以老乞骸自治冢塋起祠堂於平陵平之肥牛亭近
延陵奏請之詔為徙亭哀帝建平二年薨遂葬於彼

此則非也

漢書張禹傳張禹字子文河內軹人也徙
家蓮芍鴻嘉元年以老病乞骸骨禹年老

自治冢塋起祠堂好平陵肥牛亭部處地又近
延陵奏請求之上以賜禹詔令平陵徙亭他所沙溝

又東逕隰城北春秋僖公二十五年取大叔於溫殺
之於隰城是也京相璠曰在懷縣西南又逕殷城西

東南流入於陂陂水又值東南流入於河先儒亦咸
謂是溝為沛渠故班固及闕駰並言沛水至武德入
河蓋沛水枝瀆條分所在布稱亦兼丹水之目矣朱本
引孫克家云沛渠
沛水俱當作沛

淇水出河內隆慮縣

今為河南彰德府林縣

西大號山

明一統志云淇水在

臨河廢縣東南五里源出林慮山中綿歷太行而東至于濬縣枋頭東流入衛河

山海經曰淇水出沮如山水出山側頽波瀾注衝激
橫山山上合下開可減六七十步巨石礫硤交積隍

澗傾澗湊盪

御覽引此作
傾澗莽盪

勢同雷轉激水散氛曖若

霧合又東北活水注之水出壺關縣

今屬山
西路州

東玷臺

下石壁崇高昂藏隱天泉流發于西北隅與金谷水

合金谷即玷臺之西溪也東北會水又東流注淇水

又逕南羅川又歷之羅城北東北與女臺水會合水

發西北三女臺下東北流注于淇淇水又東北逕淇

陽川逕石城西北城在原上帶澗枕淇淇水又東北

西流水注之水出東大嶺下西流逕石樓南在北陵

石上練垂桀立亭亭極峻其水西流水也又東逕馮

都壘南世謂之淇陽城在西北三十里淇水又東出

山分為二水會立石堰遏水以沃白溝左為苑一作宛

水右則淇水自元甫城東南逕朝歌縣北今濬縣西南有古朝

歌竹書紀年晉定公二十八年按竹書紀年淇絕于舊衛乃敬王二十六年

年晉定公即位于敬王九年至二十六年乃十八年二字屬衍文 淇絕于舊衛即此

也淇水又東屈而西轉逕頓丘原本漏今濬縣有頓丘故城北故

闕駟云頓丘在淇水南又屈逕頓丘西爾雅曰山一

成謂之頓丘釋名謂一頓而成丘無高下大小之殺

也

按釋名云名一成曰頓丘一頓而成無上下大小之殺也

詩所謂送子涉淇至

于頓丘者也魏徙九原西河出軍諸胡置五軍於丘

側故其名亦曰五軍也太和泉源水水有二源一水

出朝歌城西北東南

南下疑有闕文

老人晨將渡水而沉吟

難濟紂問其故左右曰老者髓不實故暑

疑謫當作畏

寒

也紂乃於此腊脰而視髓也其水南流東屈逕朝歌

城南晉書地道記曰本沫邑也詩云爰采唐矣沫之

鄉矣殷王武丁始遷居之為殷都也

胡渭云武丁當作武乙殷本紀

曰武乙復去亳徙河北此即紂都朝歌也武丁自鄴南復遷于亳至武乙則又自亳遷于朝歌鄴注引晉

書地道記謂武丁遷居沫邑蓋誤以武乙為武丁耳

禹貢紂都在冀州大陸之

野即此矣有糟丘酒池之事焉有新聲靡樂號邑朝

歌晉灼曰史記樂書紂為朝歌之音朝歌者歌不時

也故墨子聞之惡而迴車不逕其邑論撰考識曰邑

名朝歌顏淵不舍七十弟子掩目宰予獨顧由魘墮

車宋均曰子路患宰予顧視凶地故以足魘之使墮

車也今城內有殷鹿臺

在濬縣西北六十里衛輝府淇縣亦有此臺

紂昔

自投於火處也竹書紀年曰武王親禽帝受于南單之臺遂分天之明南單之臺蓋鹿臺之異名也武王以殷之遺民封紂子武庚於茲邑分其地為三曰邶鄘衛使管叔蔡叔霍叔輔之為三監叛周討平以封康叔為衛箕子佯狂自悲故琴操有箕子操還其墟父母之邦也不勝悲作麥秀歌地居河淇之間戰國時皆屬於趙男女淫縱有紂之餘風後乃屬晉山嶮

原本作王嶮朱
本改作山嶮

多寇漢以虞詡為令朋友以難治致

弔詡曰不遇盤根錯節何以別利器乎又東與左水

合謂之馬溝水水出朝歌城北東流南屈至其城東

入東流與美溝合水出朝歌西北大嶺下更出逕駱

駝谷於中逶迤九十曲故俗有美溝之目矣歷十二

崿崿流相承泉響不斷返水捍注倦後

疑詡未詳

深隍隍

間積石下

原本作千吳本改作下

通水穴為變

宋本作萬變似是

觀者

若思

上下疑有脫史謫字

不周賞情之

若疑作苦賞情亦疑誤之疑作乏

圖狀

矣其水更逕朝歌城北又東南流注馬溝水又東南

注洪水為肥泉也故衛詩曰我思肥泉茲之永嘆毛

注云同出異歸為肥泉爾雅曰歸異出同曰肥釋名

曰本同出時所浸澗水所歸枝散而多似肥者也

按釋

名曰所出同所歸異曰肥泉本同出時所浸澗少所歸各枝散而多似肥者也據此則浸澗當作浸潤水

當作少歸健為舍人曰水異出流行合同曰肥今是

下漏各字

水異出同歸矣博物志謂之澳水詩云瞻彼淇澳菴

竹猗猗毛云菴王菴也竹編竹也

毛傳注作篇竹爾雅作篇蓄漢

武帝塞決河斬淇園之竹木以為用寇恂為河內守

伐竹淇川治矢百餘萬以益軍資

後漢書寇恂傳恂為河內太守伐淇

園之竹為矢百餘萬養馬二千匹收租四百萬斛轉以給軍

今通望淇川無復此

物唯王芻編草不異毛興

宋本作毛注

又言澳隈也鄭亦

不以為津源而張司空專以為水流入於淇非所究

也然斯水即詩所謂泉源之水也故衛詩云泉源在

左淇水在右衛女思歸指以為喻淇水左右蓋舉水

所入為左右也淇水又南歷枋堰舊淇水南東流逕

黎陽縣界

今為濬縣其故城在縣西二里

南入河地理志曰淇水出

共

漢志共縣屬河內郡

東至黎陽入河溝洫志曰在遮害亭西

一十八里至淇水口漢建安九年魏武王於水口下

大枋木以成堰遏淇水東入白溝以通漕運故時人

號其處為枋頭

枋頭在濬縣西南八十五里淇水之北即淇水口魏志曹操于淇水口下

大枋木以成堰遏淇水東入白溝以通漕運故名枋頭晉書桓溫伐慕容暉將慕容垂拒溫大破之遂

至枋頭即此地也

是以盧諶征艱賦曰後背洪枋巨堰深渠

高堤者也自後遂廢魏熙平中復通之故渠厯楊城北

東出今瀆破故竭其堰悉鐵柱木石參用其故瀆南
逕枋城西又南分為二水一水南注清水水流上下
更相通注河清水盛北入故渠自此始矣一水東流
逕枋城南東與宛口合宛水上承淇水於元甫城西
北自石堰東注宛城西屈逕其城南又東南流歷五
軍東北得舊石沮故五水分流世號五穴口今惟通
井宋本作并為二一水西注淇水謂之天井溝一水逕五
軍東分為蓼溝東入白祀陂又南分東入同山陂溉

田七十

何氏云十
疑作十

餘頃二陂所結即臺陰野矣宛水

東南入淇水淇水右合宿胥故瀆瀆受河於頓丘縣

遮害亭東

亭在濬縣西
南五十里

黎山西北會淇水處立石堰

遏水令更東北注魏武開白溝因宿胥故瀆而加其

功也故蘓代曰決宿胥之口魏無虛頓丘即指是瀆

也淇水又東北流謂之白溝逕雍榆城南

在濬縣西
南一十八

里春秋襄公二十三年叔孫豹救晉次于雍榆城者

也淇水逕其城東東北逕同山東

明一統志同山在
濬縣西南四十五

里新志云其麓綿亘四十餘里有龍脊岡岡之西有山相輔而行西屬太行曰連西岡又北逕

其城東東北逕帝嚳冢西世謂之頓丘臺非也皇覽

曰帝嚳冢在東郡濮陽頓丘城南臺陰野中者也又

北逕白祠山東歷廣陽里逕顓頊冢西俗謂之殷王

陵非也

二陵俱在滑縣東北七十里

帝王世紀曰顓頊葬東郡頓

丘城南廣陽里大冢者是也淇水又北逕頓丘縣故

城西古文尚書以為觀地矣蓋太康第五君之號曰

五觀者也

朱箋引國語士壘曰啟有五觀湯有太甲韋昭注云五觀啓子太康昆弟也今山

東東昌府觀城竹書紀年晉定公三十一年城頓丘
縣境有五觀城

皇覽曰頓丘者城門名頓丘道世謂之殷皆非也蓋

因丘而為名故曰頓丘矣淇水東北逕桂人山東

楊慎

曰桂人當作枉人見哀江南賦乃今本傳寫之譌元
和志云枉人山在黎陽縣西北四十五里俗言紂殺

比干于此故名寰宇記曰在縣西北十三里俗名上
陽三山明一統志云在濬縣西北二十五里去內黃

縣西南六十里北連跨巨岡左右溪澗不啻數百又
按蕩水篇注云宜師溝東逕蕩陰縣南又東逕枉人

山東北至內黃澤右入蕩水湯陰縣志云枉人山在
縣東南二十五里與濬縣接界是一山而跨三縣之

境也牽城西在內黃縣西春秋左傳定公十三年按春秋是

十四年今云公會齊侯衛侯于牽者也杜預曰黎陽
十三年誤

東北有牽城即此城矣淇水又東北逕石柱岡

柱人山北

連跨巨岡石
柱之類是也東北注矣

又東過內黃縣

今屬大名府

南為白溝

淇水又東北逕并陽城西世謂之辟陽城非也即郡

國志所謂內黃縣有并陽聚者也白溝又北左合陽

水又東北流逕內黃縣故城南縣右對黃澤郡國志

曰縣有黃澤者地理風俗記曰陳留有外黃故加內

史記曰趙廉頗伐魏取黃即此縣

屈從縣東北與洹水合

白溝自縣北逕戲陽城東世謂之義陽郭春秋昭公

十年

按左傳是昭公九年今云十年誤

晉荀盈如齊逆女還卒戲陽

是也

杜預注魏郡內黃縣北有戲陽城戲音許宜反

白溝又北逕高城亭東

入洹水從西南來注之又北逕問亭東即魏界也應

邵曰縣故城魏武侯之別都也城內有武侯臺王莽

之魏城亭也左與新河合洹水枝流也白溝又東北

逕銅馬城西蓋光武征銅馬所築也故城得其名矣
白溝又東北逕羅勒城東又東北漳水注之謂之利
漕口自下清漳白溝淇河咸得通稱也

又東北過館陶縣北又東北過清淵縣西

清淵縣今為
臨清州地

白溝水又東北逕趙城西又北阿難河出焉蓋魏將

阿難所導以利衡瀆首

疑

有阿難之稱矣白溝又東

北逕空陵城西又北逕喬亭城西東去館陶縣故城
十五里縣即春秋所謂冠氏也魏陽平郡治也其水

又屈逕其縣北又東北逕平恩縣故城東地理風俗
記曰縣故館陶之別鄉也漢宣帝元康三年置以封
后父許伯為侯國地理志王莽之延平縣矣淇水又
東過清淵縣故城西又歷縣之西北為清淵故縣有
清淵之名矣世謂之魚池城非也淇水又東北逕榆
陽城北漢昭帝封太常江德為侯國

按漢表
無此封

文穎曰

邑在魏郡清淵世謂之清淵城非也

又東北過廣宗縣

今屬直隸
順德府

東為清河

清河東北逕廣宗縣故城南順帝永元五年封皇太

子萬年為王國

按後漢書章帝八王傳廣宗瑒王萬歲以永元五年封分鉅鹿為國其年

薨今云萬年誤永元乃和帝年號今云順帝亦誤至云皇太子尤誤萬歲乃章帝幼子母氏亦不可考故史傳不載豈有冊立為儲君之事耶田融言趙立建興郡於城內置臨

清縣於水東自趙石始也清河之右有李雲墓雲字

行祖甘陵人好學善陰陽舉孝廉遷白馬令中常侍

單超等立掖庭民女亳氏為后

按後漢書桓帝鄧后紀后本鄧香女隨母

改嫁梁紀遂日月姓梁氏進入掖庭為米女絕幸梁冀誅立為皇后帝惡梁氏改姓為薄則亳宜作薄但

表記亦作毫豈薄與毫古字相通耶

后家封者四人賞賜巨萬雲上書移

列三府曰孔子云帝者諦也今尺一拜用不逕御者

是帝欲不諦乎帝怒下獄殺之後冀州刺史賈瑤使

行部過祠雲墓刻石表之

後漢書李雲傳雲字行祖甘陵人性好學善陰陽舉

孝廉遷白馬令桓帝延熹二年誅大將軍梁冀而中常侍單超等五人皆以誅冀功並封列侯又立掖庭

氏女亮氏為皇后后家封者四人賞賜巨萬雲素剛憂國將危心不能忍乃露布上書移副三府曰孔子

曰帝者諦也今尺一月用不經御省是帝欲不諦乎帝怒下獄殺之後冀州刺史賈琮使行部過祠雲墓

刻石表之云云今所引多為字故脩錄之

今石柱尚存俗猶為之李氏石

柱清河又東北逕界城亭東水上有大梁謂之界城
橋英雄記曰公孫瓚擊青州黃巾賊大破之還屯廣
宗袁本初自往征瓚合戰于界橋南二十里紹將鞠
後漢書義破瓚於界城橋斬瓚冀州刺史嚴綱又破
作趣

瓚殿兵於橋上即此梁也世謂之隔城橋蓋傳呼失
實矣清河又東北逕信鄉西地理風俗記曰甘陵西
北十七里有信鄉故縣也

今直隸廣平府清河縣西北有甘陵故城

清河

又北逕信城縣故城西應邵曰甘陵西北五十里有

信城亭故縣也趙置水東縣於此城故亦曰水東城

清河又東北逕清陽縣故城西

在今清河縣東本漢縣屬清河郡後漢省

入甘陵

漢高帝置清河郡治此中元二年

漢表作三年

景帝

封皇子乘為王國王莽之河平也漢光武建武二年

西河鮮于冀為清河太守作公廨未就而亡後守趙

高計功用二百萬五官黃秉功曹劉適言四百萬錢

於是冀乃鬼見白日道從入府與高及秉等對共計

校定為適秉所割匿冀乃書表自理其略言高貴不

尚節畝壟之夫而箕踞遺類研密失機婢妾其性媚

世求顯偷竊銀艾鄙辱天官易譏負乘誠高之謂臣

不勝鬼言謹因千里驛聞待

原本譌侍
宋本作付

高上之便西

北去三十里車馬皆滅不見秉等皆伏地物故高以

狀聞詔下還冀西河田宅妻子焉兼為差代以旌幽

中之訟漢桓帝建和二年改清河為甘陵王國

後漢書桓

帝紀建和二年六月改清河為甘陵王

立安平王得子經侯理為甘陵王
以下五字疑王

妖言徙其年立甘陵郡治此焉

又東北過東武城縣西

東武故城在今山東青州府諸城縣境漢縣屬琅琊郡隋改曰

諸城

清河又東北逕陵鄉西應劭曰東武城西南七十里
有陵鄉故縣也後漢封太僕梁松為侯國故世謂之
梁侯城遂立侯城縣治也清河又東北逕東武城縣
故城西史記趙公子勝號平原君以解邯鄲之功受
封于此定襄有武城故加東矣清河又東北逕復陽
縣故城西漢高帝七年封右司馬陳杳為侯國

漢表
高帝

七年封右司馬陳胥為復陽侯今云旨誤

王莽更名之曰樂歲地理風俗

記曰東武城西北三十里有復陽亭故縣也世名之

曰檻城非也清河水又東北流經棗強縣故城西

今屬

直隸正定府

史記建元以來王子侯者年表云漢武帝元

朔二年封廣川惠王子嬰為侯國也

按史記表元朔三年封廣川惠

王子嬰為棗強侯今云二年及王子嬰俱誤

應劭地理風俗記曰東武城

西北五十里有棗強城故縣也

疑當作棗強縣故城也

又北過廣川縣東

今棗強縣東有廣川縣故城

清水北逕廣川縣故城南闕駟曰縣有長河為流故
曰廣川也水側有羗壘姚氏之故居也今廣川縣治
清河又東北逕歷縣故城南地理志信都之屬縣也

王莽更名曰歷寧也應劭曰廣川縣西北三十里有

歷城亭故縣也今亭在縣東如

疑譌或當作而

此水濟尚謂

之為歷口渡也

今正定府寧晉縣東有歷城城下藪澤周四百餘里有魚藕菱芡之利

又東過修縣南又東北過東光縣西

漢志修縣屬信都國師古曰修音條

清河又東北左與張甲屯絳故瀆合阻深堤高鄣無

復有水矣又逕修縣故城南屈逕其城東修音條王

莽更名之曰治修

按漢志莽曰修治

郡國志曰故屬信都清

河又東北左與黃漳板津

宋本作枝津

故瀆合又東北逕

修國故城東漢文帝封周亞夫為侯國故世謂之北

修城也清河又東北逕邸閣城東城臨側清河晉修

縣治城內有縣長魯國孔明碑清河又東至東光縣

西南逕胡蘓亭者是世謂之羌城非也又東北右會

大河故瀆又逕東光縣故城西後漢封耿純為侯國

初平二年黃巾三十萬人入北海

據後漢書當作渤海

公孫瓚

破之於東光界追奔是水斬首三萬流血丹水即是

水也

後漢書公孫瓚傳初平二年青徐黃巾三十萬人入渤海界瓚率步騎二萬人逆擊于東光南

大破之斬首三萬餘級賊棄其輜重奔走渡河瓚因其半濟薄之賊復大破死者數萬流血丹水

又東北過南皮縣西

今屬直隸河間府

清河又東北無棣溝出焉東逕南皮縣故城南

南皮故城

在今縣東北衛河在縣西二十里與交河縣分水通典云無棣溝隋末填廢永徽元年薛大鼎為刺史奏

開之外引魚鹽于海百姓歌其利

又東逕樂亭北地理志之臨樂縣

故城也王莽更名樂亭晉書地道志太康地記樂陵國有新樂縣即此城矣又東逕新鄉城北即地理志高樂故城也王莽更之曰為鄉矣無棣溝又東分為二瀆無棣溝又東逕於樂陵郡北入東屈而北出又東轉逕宛鄉故城南又東南逕高成縣故城南與枝瀆合溝上承無棣溝南逕樂陵郡西入東南逕千童縣故城東史記建元以來王子侯者年表曰故重也一作千鍾漢武帝元朔四年封河間靖王子劉陰為

侯國應邵曰漢靈帝改曰饒安也

按史記建元以來王子侯表元朔四

年封河間獻王子陰為千鍾侯徐廣曰一作重索隱曰漢表作重侯屬平原郡地理志有重丘據此則劉

陰所封乃平原之重丘一作千鍾若勃海之千童應邵曰靈帝改曰饒安無一作千鍾之文亦非劉所封

史表漢志可據酈元渾二為一似誤劉陰史表作劉拙一云劉陰漢表作擔

滄州治枝瀆

又南東屈東北注無棣溝無棣溝又東北逕一故城

此疑作北

世謂之功城也又東北逕鹽山東北入海春

秋僖公齊楚之盟於邵陵也管仲曰昔召康公錫命

先君太公履北至於無棣蓋四履之所也京相璠曰

舊說無棣在遼西孤竹縣二說參差未知所定然管

仲以責楚無棣在此方之為近既世傳以文

二字疑謔或當

作已

且以聞見書之清河又東北逕南皮縣故城西

十三州志曰章武有北皮亭故此曰南皮也王莽之

逆河亭

漢志作迎河亭

史記惠景侯者年表云漢文帝後元

年中封孝文后兄子竇彭祖為侯國漢建安中魏武

擒袁譚於此城也清河又北逕皮城東左會潭地

宋本

池作

別瀆謂之合故謂之合城也地理風俗記曰南皮

城北五十里有北皮城也

又東北逕浮陽縣西

今為河間府滄州

河東北浮水故瀆出焉

明一統志浮水在舊滄州南十里自東光縣南界永濟渠

分出東北流經州境又東北入海漢于北置縣以在浮水之陽故名浮陽按史記趙之南

界有浮水焉浮水在南而此有浮陽之稱者蓋浮水

出入津流同逆混并清漳二瀆河之舊道浮水故迹

又自斯別是縣有浮水之名也首受清河於縣界東

北逕高城縣之宛鄉城北又東逕章武縣之故城

在今

河間府鹽山縣西北漢文帝後元中封孝文后弟竇廣國為侯

國王莽更名桓章晉太始中立章武郡治此浮水故瀆又東逕篋山北魏氏土地記曰高城東北五十里

有篋山長七里浮瀆又東北逕柳縣故城南

在今鹽山縣東

七十里漢武帝元朔四年封齊孝王子劉傷為侯國

按史

表元朔四年封齊孝王子劉陽為柳侯漢表作陽已今云劉傷誤地理風俗記曰高

城縣東北五十里有柳亭故縣也世謂之辟亭非也浮瀆又東北逕漢武帝望海臺又東注于海應劭曰

浮縣浮水所出入海朝夕往來日再今溝無復有水

也清河又北分為二瀆枝分東出又謂之浮瀆清河

又北逕浮陽故城西王莽之汜

漢志作浮

成也建武十五

年更封騎將軍平鄉侯劉歆為侯國浮陽郡治又東

北洿

當作洿

洿別瀆注焉謂之合河也

又東北過濊邑北

濊水出焉

在河間府青縣

又東北過鄉邑南

清河又東分為二水枝津右出焉東逕漢武帝故臺

北

漢武臺在今鹽山縣

魏氏土地記曰章武縣東一百里有武

帝臺南北有二臺相去六十里基高六十丈俗云漢武帝東巡海上所築又東注于海清河又東北逕紵姑邑南俗謂之新城非也

又東北逕窮河邑南

清河又東北逕窮河邑南俗謂之三女城非也東北

至泉周縣北入潯沱水經曰

疑作白

筍溝

疑作溝

泉周縣

東南與清河合者目下為清河下邑也又東泉周縣出焉

人東北過漂榆邑入于海

清河入東逕漂榆邑故城南俗謂之角飛城趙記云石勒使王述煮鹽於角飛即城異名矣魏土地記曰高城縣東北一百里北盡漂榆東臨巨海民咸煮海水藉鹽為業即此城也清河自是入于海

蕩水出河內蕩陰縣西山東

蕩陰縣今屬河南彰德府今曰湯陰

蕩水出縣西石尚山

蕩水源出湯陰縣治因元泉流經五十里過內黃縣界入衛河

泉流逕其縣故城南縣因水以取名也晉伐成都王

穎敗帝于是水之南

晉書惠帝永興初左衛將軍陳軫等奉大駕討穎馳檄四方赴

者雲集軍次安陽衆十餘萬穎遣奮武將軍右起率衆五萬次于蕩陰超衆奄出王師收績矢及乘輿侍

中嵇紹死

于帝側 盧林四王起事曰惠帝征成都王穎戰敗

時舉輦司馬八人輦猶在肩上軍人競就殺舉輦者

乘輿頓地帝傷三矢百僚奔散唯侍中嵇紹扶帝

脫疑

軍士將兵之帝曰吾吏也勿害之衆曰受太弟命唯

不犯陛下人耳遂斬之血汙帝袂將洗之帝曰嵇
侍中血勿洗也此則嵇延祖殞命之所

又東北至內黃縣

屬大名府

入于黃澤

羗水出蕩陰西北

羗水源出湯陰縣西北鶴山流至羗城東會防水入蕩水

韓大

牛泉地理志曰縣之西山羗水所出也卷水又東逕

韓附壁北又東流逕羗城北

疑作北

故羗里也

在湯陰縣北九

里一名牖城又名防城

史記音義曰牖里在蕩陰縣廣雅稱獄

犴也夏曰夏臺殷曰羗里周曰囹圄皆圜土昔殷紂

納崇侯虎之言囚西伯於此散宜生南宮括見文王

乃演易用明否泰始終之義焉美城北水積成淵方

一十餘步深一丈餘東至內黃與防水會

防水在彰德府安陽

縣西南二十里

水出西山馬頭澗東逕防城北盧諶征艱賦

所謂越防者也其水東南流注于美水又東厯黃澤

入蕩水地理志曰美水至內黃入蕩者也蕩水又東

與長沙溝水合其水導源里山北谷東流逕晉鄙故

壘北謂之晉鄙城名之為魏將城昔魏公子無忌矯

奪晉鄙軍於是處故班叔皮遊居賦曰過蕩陰而弔

晉鄙責公子之不臣者也淇水又東謂之宜師溝又

東逕蕩陰

原本漏

縣南又東逕枉人山東北至內黃澤

右入蕩水亦謂之黃雀溝是水秋夏則泛春冬則耗

水又逕內黃城南陳留有外黃故稱內也東注白溝

洹水出上黨洹氏縣

漢志上黨郡有洹氏縣洹字誤當作洹今為山西澤州陵川縣按明

一統志安陽河一名洹水源自故洹縣東至林安陽二縣屢伏屢見東入衛河

水出洹山山在長子縣也

今屬山西潞安府

東過隆慮縣北

今為河南彰德府林縣

縣北有隆慮山

在林縣西北二十五里南負太行北接恒嶽景最奇絕

昔帛仲

理之所遊神也縣因山以取名漢高帝六年封周竈

為侯國應邵曰殤帝曰隆故改從林也縣有黃水出

于神囷之山黃華谷地

宋本作北

崖山高十七里

明一統志黃華

山在林縣西二十里一名林慮山下有黃華谷北巖出瀑布

水出木門帶帶即山

之第三級也去地七里懸水東南注壑直瀉巖下狀

若雞翹

史游急就章曰春草雞翹危翁漚顏師古曰雞翹雞尾之曲垂也

故謂之雞

翹洪蓋亦天台赤城流也其水東流至谷口潛入地
下東北一十里復出名柳渚渚周四五里是黃水重
源再發也東流葦泉水注之

葦泉在林縣西北林慮山泉傍多葦故名

出

林慮川北澤中東南流與雙泉合水

宋本水下有出字

魯般

門東下流入葦泉水葦泉水又東南流注黃水謂之
陵陽水又東入於洹水也

又東北出山逕鄴縣南

古鄴城在今彰德府臨漳縣西二十里本戰國魏之鄴邑曹魏

後魏前燕東魏皆都於此

洹水出山連逕殷墟北竹書紀年曰盤庚即位自奄

遷于此遂曰殷

竹書紀年曰盤庚十四年自奄遷于北蒙曰殷則此遂二字恐當作北蒙

昔者項羽與章邯盟於此地矣洹水又東枝津出焉

東北流逕鄴城南謂之新河又東分為二水北水逕

東明觀下昔慕容儁夢石虎齧其臂寤而惡之購求

其尸而莫知之後宮嬖妾言虎葬東明觀下於是掘

焉下度三泉得其棺剖棺得尸尸僵不腐儁罵之曰

死胡安敢夢生天子也使御史中尉陽約數其罪而

鞭之此蓋虎始葬處也又北逕建春門石梁不高大

治石工密舊橋首夾建兩石柱螭短

疑有譌字一作矩

趺勒

甚佳乘輿南幸以其作制華妙致之平城東側西屈

宋本作闕

北對射堂津

宋本作淥

水平潭碧林浦側可遊意矣

其水際其西逕魏武玄武故苑苑舊有玄武池以肄

舟楫有魚梁釣臺竹木灌叢今池林絕滅略無遺跡

矣其水西流注于漳南水又東北逕女亭城北又東

北逕高陵城南東合垆溝又東逕鸕鵒陂北與台陂

水合陂東西三十里南北注白溝河溝上承洹水北

絕新河北逕高陵城東又北逕斥丘縣故城西今為直隸

廣平府咸安縣其故城在縣西

縣南角有斥丘蓋因丘以氏縣故乾

侯矣春秋經書昭公二十八年公如晉次于乾侯也

漢高帝六年封唐廣為侯國

按史表作唐屬此云唐廣誤

王莽之

利丘矣又屈逕其北城東北流注于白溝洹水自鄴

東逕安陽縣故城

原本漏今彰德府治

北徐廣晉紀曰石遵自

孚城北入軒

疑訛當是軒


張豹於安陽是也魏土地記曰

鄴城南四十里有安陽城城北有洹水東流者也洹水又東至長樂縣左側則溝出焉洹水又東逕長樂縣故城南按晉書地理志曰魏郡有長樂縣也

又東過內黃縣北東入于白溝

洹水逕內黃縣北東流注于白溝世謂之洹水也許慎說文吕忱字林並云洹水出晉魯之間昔聲伯夢涉洹水或與其瓊漿而食之泣而又與瓊瑤盈其懷矣從而歌曰濟洹之水贈我以瓊瑰歸乎歸乎瓊瑰

盈吾懷乎後言之暮而卒即是水也



水經注集釋訂訛卷九